

東
華
續
錄

東華續錄

同治二

臣王先謙敬編

臣張式恭恭校

冬十月丙辰朔諭內閣前因肅順跋扈不臣招權納賄種種悖謬當經降旨將肅順革職派令睿親王仁壽醇郡王奕譞卽將該革員拏交宗人府議罪乃該革員於接奉諭旨之後咆哮狂肆目無君上悖逆情形實堪髮指且該員恭送梓宮由熱河回京輒敢私帶眷屬行走尤爲法紀所不容所有肅順家產除熱河私寓令春佑嚴密查鈔外其在京家產著卽派西拉布前往查鈔毋令稍有隱匿○授恭親王奕訢爲議政王在軍機處行走○調瑞常爲戶部尙書以愛仁爲工部尙書麟魁爲左都御史載齡爲刑部右侍郎署禮部右侍郎○命大學士桂良戶部尙書沈兆霖右侍郎寶鋆在

軍機大臣上行走鴻臚寺少卿曹毓瑛在軍機大臣上學習行走
○命戶部左侍郎文祥仍在軍機大臣上行走○命倭仁頒 詔
後來京調和潤爲盛京戶部侍郎清安爲盛京刑部侍郎以載肅
爲盛京工部侍郎○予江西陣亡訓導曾騶祭葬世職○丁巳諭
內閣朕以冲齡煢煢在疚仰承 皇考付託之重遣大投艱不遑
自恤幸蒙兩宮 皇太后保護藐躬親理大政昨經降旨諭令王
大臣大學士六部九卿翰詹科道敬謹會議兩宮 皇太后垂簾
召見臣工禮節及一切辦事章程諒能酌古準今折衷定議期於
庶理罔愆百度具舉伏念 列聖御極以來俱頒 詔旨求言誠
以人之聰明智慮有所未周必能兼聽並觀而後上下之情通措
施可期於允當我 皇考御極初年手詔褒答直臣廣開言路諫
議時聞天下欣欣向治乃自近年以來事勢艱危一二奸邪乘間

肆其蒙蔽以致盈廷緘默建議寥寥言路久爲閉塞公論弗伸事
機愈益舛戾朕以冲人未堪多難重賴兩宮 皇太后萬幾日理
王大臣等黽勉翼爲何敢不博採讜論虛公攬納期以施行措正
上理日臻矧當各省軍務未竣民生多蹙凡爲臣子均當竭誠抒
悃之時豈宜醜正惡直苟安緘默用特通諭中外臣工九卿科道
有奏事之責者於用人行政一切事宜皆得據實直陳封章密奏
務期各抒所見毋以空言塞責以副朕側席求言之至意○諭議
政王軍機大臣等肅順於熱河蓋造房屋年餘尙未完工所蓄貲
財諒必不少著派春佑將該革員所有熱河財產密速查鈔候旨
該革員身攬重罪難保不於事前寄頓並著春佑傳諭熱河道福
厚承德府知府靈杰熱河總管毓泰將寄頓之處悉爲指出一律
查鈔儻福厚等敢於扶同隱匿不吐實情將來別經發覺定當重

治其罪不能寬貸該都統於派辦要事亦應認真辦理不得稍涉徇隱將此由五百里諭令知之○申嚴門禁○以貴州貞豐州城陷田興恕下部議處○予貴州陣亡知州蔣時純知縣胡祖寅等世職○戊午 大行皇帝梓宮至京 上出德勝門跪迎奉安於乾清宮 上以懋勤殿爲倚廬日詣 几筵前奠獻三次○諭議政王軍機大臣等聯捷段晴川奏東匪復竄豫境力籌防剿各摺片聯捷等身任防河責無旁貸見已照請撥給月餉即可將開州長垣舊練勇丁選調前往自無兵單餉絀之慮著卽督飭兵勇於上下泝河干嚴密防剿毋許稍涉鬆懈儻有賊一人渡河朕惟聯捷等是問恐不能當此重咎也此股賊匪係由東省入豫並著勝保譚廷襄分別派兵嚴行扼剿毋任連蹤西竄其大名府小灘龍王廟等處賊匪並著勝保速籌掃蕩勿令滋蔓邨山等處匪徒未

可任令久踞大河南岸儻與祥符陳畱境內另股匪徒勾結則勦辦更難措手卽著嚴樹森調派官兵分別勦捕毋畱餘孽其彰衛等屬防堵事宜並著悉心籌畫妥爲辦理將此由五百里各諭令知之○以奉移 大行皇帝梓宮子扈從王公大臣官員等加級紀錄並賞校尉夫役銀○已未以 蘆殿整齊橋道穩固授文煜直隸總督予辦差文武加級賞驍騎校兵丁半月錢糧○庚申

上奉 大行皇帝几筵前行初祭禮○諭內閣大學士周祖培奏

建元年號可否更定一摺奉 母后皇太后 聖母皇太后懿旨

建元大典昭垂萬世前經載垣等擬進祺祥字樣意義重複本有

未協茲據周祖培奏請更正實屬關心典禮周詳慎重深愜 慈

懷爰命議政王軍機大臣恭擬同治二字進呈仰蒙 母后皇太

后 聖母皇太后允行本月初九日朕御極頒詔其以明年爲同

治元年布告天下○山東巡撫譚廷襄奏南捻撲犯省城被擊東
竄復經僧格林沁由青州莒州沂州一帶追至臺莊截殺殆盡惟
此係逆首趙浩然等最後一股其先經竄出並由沂州日照莒州
竄入等股人數甚眾沿途分擾登萊青所屬幾於無處不到見經
各路兵團擊退另有一股由昌濰圍困膠州亦經擊散回竄諸城
莒州而去惟高密尚有餘匪青州所屬之壽光縣又有一股約五
六千人屯聚多日近復西竄長山章邱一帶勢將撲省並探聞有
欲渡大清河之說臣一面飛飭沿河州縣兵團協力防守並將船
隻提至北岸以防偷渡一面調集兵勇親駐城外土圍晝夜嚴防
仍飭東路兵團到處邀擊不使該逆旁竄 上諭議政王軍機大
臣等山東擒匪經僧格林沁追至臺莊截殺殆盡其竄入登萊青
各股亦經兵團擊退惟高密餘匪及壽光一股近復西竄長山章

邱一帶勢將撲省並探聞有欲渡大清河之說山東省北地方毗連畿南關繫緊要著勝保迅速督飭兵勇探明賊蹤迎頭截擊嚴遏北竄以固疆圉並著譚廷襄調集兵團沿河防堵毋任偷渡天津河間一帶地當衝要卽由文煜撥兵防守並聯絡鄉團於直東交界地方擇要堵禦毋令匪蹤闖入○辛酉諭內閣宗人府會同大學士九卿翰詹科道等定擬載垣等罪名請將載垣端華肅順照大逆律凌遲處死等因一摺載垣端華肅順朋比爲奸專擅跋扈種種情形均經明降諭旨示知中外至載垣端華肅順於七月十七日 皇考升遐卽以贊襄政務王大臣自居實則我 皇考彌留之際但面 諭載垣等立朕爲皇太子並無令其贊襄政務之諭載垣等乃造作贊襄名目諸事並不請旨擅自主持卽兩宮皇太后面諭之事亦敢違阻不行御史董元醇條奏 皇太后

垂簾等事宜載垣等非獨擅改諭旨並於召對時有伊等係贊襄
朕躬不能聽命於 皇太后伊等請 皇太后看摺亦係多餘之
語當面咆哮目無君上情形不一而足且每言親王等不可召見
意存離開此載垣端華肅順之罪狀也肅順擅坐御位於進內廷
當差時出入自由目無法紀擅用行宮內 御用器物於傳取應
用物件抗違不遵並自請分見兩宮 皇太后於召對時詞氣之
間互有抑揚意在構釁此又肅順之罪狀也一切罪狀均經 母
后皇太后 聖母皇太后面諭議政王軍機大臣逐款開列傳知
會議王大臣等知悉茲據該王大臣等按律擬罪請將載垣端華
肅順凌遲處死當即召見議政王奕訢軍機大臣戶部左侍郎文
祥右侍郎寶鋆鴻臚寺少卿曹毓瑛惠親王惇親王奕詝醇郡王
奕譞鍾郡王奕詒孚郡王奕譔睿親王仁壽大學士賈楨周祖培

刑部尙書綿森面詢以載垣等罪名有無一綫可原據該王大臣等僉稱載垣端華肅順跋扈不臣均屬罪大惡極於國法無可寬宥並無異辭朕念載垣等均屬宗人遽以身罹重罪悉應棄市能無淚下惟載垣等前後一切專擅跋扈情形實屬謀危社稷是皆

列祖 列宗之罪人非獨欺凌朕躬爲有罪也在載垣等未嘗

不自恃爲顧命大臣縱使作惡多端定邀寬宥豈知贊襄政務

皇考並無此諭若不重治其罪何以仰副 皇考付託之重亦何

以飭法紀而示萬世卽照該王大臣等所擬均卽凌遲處死實屬情眞罪當惟國家本有議親議貴之條尙可量從末減姑於萬無可貸之中免其肆市載垣端華均著加恩賜令自盡卽派肅親王華豐刑部尙書綿森迅卽前往宗人府傳旨令其自盡此爲國體起見非朕之有私於載垣端華也至肅順之悖逆狂謬較載垣等

尤甚亟應淩遲處死以申國法而快人心惟朕心究有所未忍肅
順著加恩改爲斬立決卽派睿親王仁壽刑部右侍郎載齡前往
監視行刑以爲大逆不道者戒至景壽身爲國戚緘默不言穆蔭
匡源杜翰焦祐瀛於載垣等竊奪政柄不能力爭均屬孤恩溺職
穆蔭在軍機大臣上行走最久班次在前情節尤重該王大臣等
擬請將景壽穆蔭匡源杜翰焦祐瀛革職發往新疆效力贖罪均
屬咎有應得惟以載垣等兇殘方張受其箝制均有難與爭衡之
勢其不能振作尙有可原御前大臣景壽著卽革職加恩仍畱公
爵並額駙品級免其發遣兵部尙書穆蔭著卽革職加恩改爲發
往軍臺效力贖罪吏部左侍郎匡源署禮部右侍郎杜翰太僕寺
卿焦祐瀛均著卽行革職加恩免其發遣○都興阿奏天長踞匪
分擾銅山等處九月初八日竄至陳家集地方經總兵詹啟綸親

督馬步各隊分路鈔擊斃賊甚多生擒悍賊十九名餘眾聞風退遁其下游江面之賊亦經總兵周希濂等先後擊退其江陰賊船竄至黃山港等處又經遊擊郭定猷等就近轟擊燒毀賊船三十餘隻斃賊不計其數近聞南岸逆賊搶擄民船意欲北渡臣惟檄飭各軍分扼水陸要隘嚴加防範以固藩籬奏入報聞○予山東陣亡遊擊陳其恕縣丞喬書年祭葬世職○壬戌諭內閣朕奉

母后皇太后 聖母皇太后懿旨各直省將軍督撫等摺奏向於呈遞之次日硃批發還其有應降諭旨者亦卽令軍機大臣繕擬於進呈後卽行交發其各路軍營緊要奏報則無論何時呈遞均係卽行辦理見在一切政務仰蒙 皇太后躬親裁制 慈懷沖挹深恐於 披覽章奏未能周詳嗣後各直省及各路軍營摺報應行降旨各件於呈遞兩宮 皇太后慈覽發交議政王軍機大

臣等悉心詳議於當日 召見時恭請 諭旨再行繕擬於次日
恭呈 母后皇太后 聖母皇太后閱定頒發應行批荅各件該
王大臣查照舊章敬謹繕擬呈遞後一併於次日 發下其緊要
軍務事件仍於遞到時立即辦理以昭慎重○諭前因 郊祀配
位於道光三十年奉有 皇考大行皇帝嗣後以 三祖 五宗
爲定之 諭朕不忍遽從亦不敢遽定諭令王大臣等敬謹詳議
旋據禮親王世鐸等先後分別議奏本日復據潘祖蔭許彭壽奏
議禮大典請飭廷臣再議以昭慎重一摺著王大臣會同大學士
九卿翰詹科道敬謹妥議具奏其禮親王世鐸等睿親王仁壽等
吏部右侍郎黃宗漢並載垣等摺均著發給該王大臣閱看一併
議奏○諭昨據王大臣等會議載垣等罪名奏請照大逆律凌遲
處死經朕法外施仁將肅順改爲斬決載垣端華賜令自盡此朕

於無可寬貸之中不得已委曲施恩業已揮涕宣示矣我宗室自開國以來夾輔王室厯著公忠載在史冊乃載垣等肆無忌憚悖逆情形凡在臣民同深切齒實爲宗支之玷嗣後我宗室等務各恪遵家法黽勉趨公奮武揆文同襄郅治朕推本一氣首重親親庶幾邇戴公朝增輝瑤牒其各族宗室未登仕籍者亦應敦品勵行以備將來因材器使用彰我宗室人才之盛儻或不自檢束身罹法網則載垣等以親王大臣朕尙不能屈法市恩況閒散宗室豈能稍存寬宥不執法以從事耶著管理宗人府王等將此旨宣諭各宗室知之○諭昨因載垣等跋扈不臣狂悖無狀據王大臣等奏請照大逆律凌遲處死朕特援議親議貴之條分別加恩將肅順改爲斬決載垣端華賜令自盡並將景壽穆蔭匡源杜翰焦祐瀛分別革職治罪矣因思王公內外文武大臣均受 皇考大

行皇帝深恩特備任使朕以沖齡踐阼國家多難深賴股肱心膂
共效勛勤爾王大臣等如能以國計民生爲念宣力朝廷用登郅
治朕必敬禮大臣保全終始以成一德儻敢納賄招權營私舞弊
以致蠹國病民則法律者朕受之 列祖 列宗與天下臣民共
之何敢稍有枉縱以拂眾情是用特諭王公內外文武大臣經此
次訓飭之後務各精白乃心力除積習儻有前項弊端則載垣等
前車具在朕縱欲曲法以示恩亦何以對天下乎至從前載垣等
罪狀未著之先在廷臣工非不深知乃竟畏其兇醜緘默不言甚
至有依附逢迎冀圖富貴者以致勢成滔天致朕今日不得不執
法以示懲嗣後儻有如載垣等專擅不臣者爾王大臣等以及科
道卽行據實參奏朕必立予治罪並獎勵敢言以彰直諫儻仍前
緘默別經發覺則爾王大臣等孤負朕恩朕亦不能寬宥也將此

通諭王公內外文武大臣知之其各懷遵母違朕命○諭前因許彭壽於摺問載垣端華肅順時敬陳管見摺內有查辦黨援一條常令議政王軍機大臣傳旨令其指出黨援諸人實迹嗣據明白回奏形迹最著者莫如吏部尙書陳孚恩蹤迹最密者如侍郎劉崐黃宗漢伊等平日保舉之人如侍郎成琦太僕寺少卿德克津太候補京堂富績外間皆嘖有煩言陳孚恩於上年七月 大行皇帝發下 硃批命諸臣會議巡幸熱河是否可行陳孚恩卽有竊負而逃遵海濱而處之語意在迎合載垣等當時會議諸臣無不共聞 大行皇帝龍馭上賓滿漢大臣中惟令陳孚恩一人先赴行在是該尙書爲載垣等之心腹卽此可見黃宗漢於本年春間前赴熱河蒙 皇考召見卽以危詞力阻 回鑾迨聞 皇考梓宮有回京之信該侍郎又以京城情形可慮徧告於人希冀阻

止其爲意存迎合載垣等眾所共知以上二人均係一二品大員
聲名如此狼藉品行如此卑污若任其濫厠卿貳何以表率僚屬
陳孚恩黃宗漢均著革職永不敘用以爲大僚輒媚巧滑者戒至
侍郎劉崐成琦太僕寺少卿德克津太候補京堂富績雖無與載
垣等交通實據而或與往還較密或由伊等保舉起官或拜認師
生眾人耳目共見其間何能置之不議劉崐成琦德克津太富績
均著卽行革職以示懲儆許彭壽糾彈各節朕已早有所聞用特
懲一儆百期於力振頽靡至載垣端華肅順三人事權所屬諸臣
等何能與之絕無干涉此後朕惟以寬大爲心不咎既往爾諸臣
亦毋許再以查辦黨援等事紛紛陳奏致啟訐告誣陷之風惟當
各勤厥職爭自濯磨守正不阿毋蹈陳孚恩等惡習朕實有厚望
焉將此通諭大小臣工知之○以麟魁爲兵部尙書倭仁爲左都

御史

由盛京戶部侍郎遷

調李蒞爲吏部左侍郎

由工部調

○癸亥

上以登

極日期詣

大行皇帝几筵前祇告行禮

○諭內閣朕奉

母后

皇太后

聖母皇太后懿旨上年京畿不靖

皇考大行皇帝特

命恭親王奕訢留駐京師辦理一切事宜經權互用均就妥協內

外人心如常安謐

皇考大行皇帝駐蹕熱河山莊時常垂念慰

悅實深屢欲於

回鑾後特沛殊恩用示嘉獎及至大漸猶復念

念不忘見在

梓宮回京朕奉兩宮

皇太后旋蹕以來卽派恭

親王奕訢爲議政王在軍機處行走秉公持正力矢忠勤痛惟

先帝遺言在耳厥意未申曷敢不仰承

先志懋賞酬庸以彰繼

述因於召見恭親王奕訢時宣示此旨著以親王世襲罔替實屬

論功行賞允愜眾心用慰

在天之靈非予一人之私願也乃恭

親王奕訢至誠摯抑洒涕固辭情詞至爲懇摯我 母后皇太后

聖母皇太后再三申明此係先帝恩旨而該王辭謝倍力聲
淚俱下兩宮皇太后未忍重拂其意不得已姑從所請將世襲
親王罔替之旨暫從緩議俟朕親政之年再行辦理恭親王奕訢
著先賞食親王雙俸以示優禮王其欽承朕命勿再固辭用彰懿
美而顯貽謀○諭恭親王奕訢奏滙陳悚惕請飭諸臣各抒所
見以求折衷一摺朕奉母后皇太后聖母皇太后懿旨授恭
親王奕訢爲議政王在軍機處行走誠以朕年在幼冲遽膺大寶
仰承皇考付託之重幸蒙兩宮皇太后庶務親裁使非輔翼
得人何以勤求上理恭親王奕訢賢親眾著朝野咸知皇考大
行皇帝在位曾蒙特簡贊理樞廷深資倚畀上年京畿弗靖又
復畱駐京師辦理一切事務均極妥協我母后皇太后聖母
皇太后謹循家法授以議政王並掌樞機此實默體皇考燕翼

貽謀該親王滋命益恭其盡忠竭慮以保乂我邦家固爲至誼所不容辭詎非天下臣民所同繫望耶乃茲據王奏稱責重任大當茲中外多事深恐見識偶疏致滋貽誤籲懇諭飭中外大小臣工於朝廷用人行政各抒所見共求折衷並有自古大臣未有不開誠布公集思廣益而可以任天下之重等語謙卑惻怛具見惓忱當此國家多事之秋王以懿親而膺重寄凡可以安國家利社稷者自罔不竭盡心力而我諸臣皆身受國恩亦豈有不及時思效奮其忠誠以紓多難者乎前經降旨詔求直言茲特再行申諭中外大小臣工嗣後於朝廷用人行政各有所見務當切實直陳毋得稍存畏匿隱忍之見我兩宮 皇太后方詢切芻蕘以求治理卽恭親王奕訢正欲與諸臣精白一心同襄郅治亦得虛衷參酌盡其多方延攬之誠爾諸臣其書思納誨陳善閉邪竭爾股肱

耳目動予心聲母負諄諄申命爰咨爰度之懷實有厚望焉將此
通諭中外知之○諭軍機大臣等賈臻奏逆匪吳正誼爲苗逆死
黨見在偏脅潁阜民圩幾及二百處該署撫存營兵勇無多請飭
勝保先派文武大員率馬步一二千名星馳來潁等語該逆偏脅
民圩勢甚猖獗賈臻存兵無多不敷剿辦自係實在情形著勝保
酌量情形如可分撥馬步官兵卽著派委得力大員統帶前往協
同攻剿毋稍遲誤將此由六百里諭令知之○飭催四川造報軍
需並諭各直省督撫及各路統兵大臣均照戶部定章奏報○諭
春佑安撫熱河回民○調朱鳳標爲吏部尙書以萬青黎爲兵部
尙書由左都御史遷○調孫葆元爲吏部右侍郎由禮部左調○以董恂爲戶部
右侍郎由順天府尹遷單懋謙爲工部左侍郎由內閣學士遷崇綸爲倉場侍
郎前任倉場侍郎甲子 上卽皇帝位於太和殿遣官祭告 大地

太廟

社稷是日詣

大行皇帝梓宮前行祭告禮更禮服詣

鍾粹宮

母后皇太后前儲秀宮

聖母皇太后前行禮出御殿

受朝頒詔天下以明年爲同治元年加恩中外罪非常赦所不原

者咸赦除之○頒同治元年時憲書○諭內閣朕奉

母后皇太

后 聖母皇太后懿旨見在一切政務均蒙兩宮

皇太后躬親

裁決諭令議政王軍機大臣遵行惟繕擬諭旨仍應作爲朕意宣

示中外自宜欽遵

慈訓嗣後議政王軍機大臣繕擬諭旨著仍

書朕字將此通諭中外知之○諭前以惇親王恭親王醇郡王鍾

郡王孚郡王均係朕之叔業經降旨除朝會大典外其尋常召對

及內廷宴資均毋庸叩拜以示優隆因思諭旨奏章內仍復書名

朕心實有不安嗣後惇親王恭親王醇郡王鍾郡王孚郡王除朝

祭大典外其餘諭旨並各衙門奏摺止書王號均著毋庸稱名用

示朕敬長親親有加無己之至意○諭都興阿奏匪眾分路竄擾疊經官軍擊退並水師遏剿賊船連獲勝仗一摺天長六合等踞匪糾合捻眾竄出分擾九月初八等日賊至官橋陳家集等處總兵詹啟綸親督馬步各隊相機迎剿守備劉萬青由青山營鈔擊領隊德雲等各隊星馳前往衝擊斃賊數百名生擒長髮老賊十九名餘眾聞風退遁下游江面總兵周希濂督飭艇師先扼壩口復經鞠耀乾師船接應賊復潰退其江陰賊船竄至黃山港等處經遊擊郭定猷等迎剿擊沈賊船十數隻燒毀三十餘隻斃賊不計其數著都興阿卽嚴飭各營分扼要隘乘勝進剿毋任分竄以清江面○諭議政王軍機大臣等毛鴻賓奏湖南省籌辦三面防剿情形一摺湖南三路警報同時並至亟應實力防剿尤須鄰省通力合作方足以遏賊鋒而防滋蔓著駱秉章田興恕於川黔賊

勢所趨之地亟派兵勇分投追截與楚境各軍前後夾擊湖南省

調兵籌餉外攘內安情形雖屬竭蹶仍著毛鴻賓督飭該文武不

分畛域會合川黔各路兵勇防剿以靖邊疆將此由五百里各諭

令知之○以王慶雲爲左都御史

前兩廣總督

未到任前命前任大學

士彭蘊章署理○以宜振爲禮部左侍郎

由內閣學士遷

○乙丑 聖母

皇太后聖壽節 上詣平安室行禮○諭內閣朕惟 皇考大行

皇帝敬荷 康慈皇太后撫育深恩在位之日疊晉尊封奉事

東朝問安視膳直數年如一日 聖孝隆禮寰海聞知止以 仙

馭遐升未申 配廟之儀暫行奉祀於 奉先殿我兩宮 皇太

后夙侍 先皇備知 仁孝至誠之隱蓋無日不有懷明發也痛

惟 皇考龍馭上賓朕以冲人寅承大命我國家以孝治天下繼

述之禮孰重於斯茲奉 母后皇太后 聖母皇太后懿旨追惟

康慈皇太后侍奉 皇祖宣宗成皇帝徽柔素著及保護我

皇考備極恩勤允宜聿晉 徽稱媿隆 三后禮崇 配廟義本

承 先用慰 皇考在天之志以申冲人報本之思應如何議加

尊諡之處大學士會同六部九卿詳議具奏○諭 皇祖宣宗成

皇帝嬪御前經 皇考大行皇帝加崇位號茲朕御極之初宜晉

隆稱以申敬禮 琳貴太妃誕育醇郡王鍾郡王孚郡王壽禧和

碩公主謹尊封爲 琳皇貴太妃 彤嬪誕育壽莊和碩公主尊

封爲 彤妃 佳嬪尊封爲 佳妃 成嬪尊封爲 成妃 順

貴人尊封爲 順嬪 蔡常在尊封爲 蔡貴人 尙常在尊封

爲 尙貴人 李常在尊封爲 李貴人 那常在尊封爲 那

貴人所有應行事宜著該衙門察例具奏○諭 皇考大行皇帝

妃嬪承侍宮闈恪恭淑慎均宜加崇位號以表尊榮 麗妃侍奉

一皇考有年誕育大公主謹尊封爲 麗皇貴妃 婉嬪晉封爲

婉妃 祺嬪晉封爲 祺妃 玫嬪晉封爲 玫妃 璪貴人

晉封爲 璪嬪 容貴人晉封爲 容嬪 璫貴人晉封爲 璫

嬪 玉貴人晉封爲 玉嬪 吉貴人晉封爲 吉嬪 禧貴人

晉封爲 禧嬪 慶貴人晉封爲 慶嬪所有應行事宜著該衙

門察例具奏○諭朕奉 母后皇太后 聖母皇太后懿旨諭知

總管內務府大臣所有應行添製金銀器皿等件均有成例惟念

列聖家法以節儉爲天下先卽民物豐阜亦當防奢侈之漸矧

值四方多故物力維艱豈復容以宮闈器用耗天下之財力此項

金銀器皿除典禮攸關必須添製外其餘各項並著該管大臣詳

覈辦理日後遇有此等事件該管大臣等宜各仰體此意以力行

節儉爲要朕仰蒙 慈訓諄切實深欽感總管內務府大臣其遵

諭行○諭僧格林沁受 三朝知遇之恩宣力中外功勳卓越
見在統兵勦辦捻教各匪紀律嚴明兵民愛戴朕欣慰之餘尤深
睦系允宜特沛恩施用彰殊眷僧格林沁著賞還博多勒噶台親
王以示朕優異蓋臣至意○諭前據少詹事許彭壽奏請清理庶
獄御史林壽圖奏行寬政以培元氣並聲明戶部五字鈔票各案
株連太甚各一摺所奏甚是朕已於登極詔內將一切情有可原
者悉行赦除矣我國家以忠厚開基 列聖闡澤覃敷 恩同覆
幬 皇考大行皇帝尤明慎折獄是以 御極十餘年屢頒肆赦
之條卽如許彭壽林壽圖摺內所稱戶部五字鈔票案內波及至
數百人繫獄至兩三載深可矜憫此案從前載垣等意存羅織藉
作威福遂致鍛鍊周內連累多人當此政令維新之日自應速爲
清理所有此案內監禁之官員商民人等均著該部詳審案情迅

速擬結其應行省釋者卽予省釋如有冤抑者並速爲昭雪總期無縱無枉悉歸平允至於閭閻小民無知犯法爲民上者方且矜恤之不暇乃嚴酷有司率以苛刻爲稱職遂至捕風捉影罪及無辜朕哀矜庶獄良用惻然著內外大小問刑各衙門詳悉查明概行清理卽有案內要證不得不逮繫者亦卽將案情趕緊審結不准任意拖延累及良民庶敦寬大之風用副協中之治將此通諭內外問刑衙門知之○僧格林沁奏臣追剿趙浩然等股擒匪獲勝後九月十七日准徐揚海道吳棠來營臣當將招撫擒首魏澹沅投誠事宜飭令就近妥辦並派桂錫楨前往蘭郊一帶招降棍匪以期勦撫兼施嗣據桂錫楨回營稟稱見在匪首周九卽周克生劉雙印等知官軍勦擒疊勝頗知斂迹一經招撫卽薙髮來歸臣因傳見周克生等曉以大義該匪等俯首知罪情願隨營效力

自贖前愆當經准其投誠飭令回圩選帶馬步三千人隨營剿賊正在辦理閒探悉山東擒匪田蘭山分爲兩股盤踞郟城大灘等處臣於九月二十一至二十五等日親督兵勇合力進攻該逆向窯灣竄逸其後股亦渡沂河向西南奔竄經國瑞德楞額督隊追擊至距邳州三十里之泇口運河北岸該逆尙未渡河約計賊匪連裹脅難民共萬餘名瞥見我軍賊卽列隊橫互泇口迤北拌死抗拒我軍奮力衝殺斃賊五六百名逆眾渡河逃竄落水淹斃者不計其數救出難民數千名該逆遂連夜晝水逃遁我軍暫駐邳州卽據淮徐揚海道吳棠稟稱敗匪不及二千名竄過徐州經存城兵勇並銅蕭各圩練勇截殺所餘回巢賊匪無幾等語查竄入山東各股皖捻業經殲除殆盡沂屬匪首周克生等雖已悔罪投誠第江南山東毗境尙有棍匪滋擾並不時勾結南捻蹂躪東境

自應乘此聲威一律剿除臣於追賊到邳時卽據紅花埠紳董聯名稟訴江南宿遷縣屬劉馬莊棍匪劉業居聚眾勾結捻逆擾害地方當飭營總何建黿等帶隊馳赴劉馬莊攻剿該逆抵死固守我軍直擣賊圩將其內壘攻破先後斃賊一千餘名劉業居乘夜東竄其邳州所屬孟家樓地方匪首孟繼往句結南捻四出竄擾經德楞額帶同投誠之周克生等自邳州馳赴該處將孟繼往擒獲訊明正法我軍屢獲勝捷人心稍定惟江南淮徐山東兗沂輦員遼闊無險可扼此次各股捻逆受創回巢難保不再行勾結覬覦北路是山東邊防亟應豫爲籌畫竊思該省邊防除沿河堵禦別無良策運河自東平汶上以至邳宿桃源隄岸縣長河水正淺若不聯絡民團分段防守恐兵力單薄不足以資抵禦臣見責成運河道敬和趕緊將戴村壩工修築穩固使入運之水不至旁流

河水既涸沿隄兵民聯絡可期捍衛臣已札調候補道黃良楷來沂會辦防河事宜並咨山東撫臣譚廷襄選派明幹道府一二員來沂協同經理再臣於十月初二日據安邱等縣稟報復有另股捻匪自膠州一路向西回竄臣於拜摺後卽督飭馬步各隊前往追剿上諭議政王軍機大臣等僧格林沁奏剿回竄捻匪獲勝並剿撫蘭嶧邳宿各匪情形辦理極爲得手該大臣因有另股捻匪自膠州向西回竄業已督飭兵勇前往追剿惟膠州地處東北此時南路蘭邳等處是否業已肅清設官軍鼓行而東而沂屬捻匪復乘其後未免有孤軍深入之虞不可不加慎重昨據譚廷襄奏膠州股匪業已被擊回竄諸城莒州惟高密餘匪及壽光一股屯聚日多近復西竄長山章邱一帶將撲省城僧格林沁自應先其所急回援省城以顧東省大局若遽行親赴東路恐有顧彼失

此之慮卽著該大臣妥籌辦理至曹屬會匪日形滋蔓譚廷襄兵力不敷該大臣亦應顧及應如何分兵剿捕之處並著悉心籌畫將此由六百里諭令知之○調吉林馬隊一千赴山東剿賊○以恆祺爲內閣學士○丙寅申刻東南方有聲如雷○諭內閣熱河避暑山莊停止巡幸已四十餘年所有殿庭各工日久未修多就傾圯上年我皇考大行皇帝舉行秋獮駐蹕山莊不得已於各處緊要工程稍加葺治見在梓宮已恭奉回京朕奉兩宮皇太后亦已旋蹕所有熱河一切未竟工程著卽停止○諭議政王軍機大臣等勝保奏東匪業由觀城回竄仍踞范縣諒不至深入西擾惟嚴樹森由陳州回省將兵勇悉數調回僅畱毛昶熙困處歸德以致捻匪由睢柘等處西竄洛陽境內徧地賊蹤附近省城東面西面均有賊營該匪聲言圖竄山陝萬一不能堵禦其患

不可勝言近接探報並詢之豫省來營弁兵知嚴樹森剛復自用
棄疆土民生於不顧特將探稟鈔錄呈覽各等語嚴樹森荷 皇
考大行皇帝厚恩擢任豫撫全省軍務皆其專責見在邙山匪徒
久行盤踞祥符陳畱復有匪蹤均豫省腹心之患著責成嚴樹森
迅速調兵分途進剿實力埽蕩務期肅清全省儻敢稍涉延玩以
致匪勢日張或西趨山陝擾及完善朕惟該撫是問至勝保督辦
皖豫軍務復須勦辦山東會教各匪此時東省匪眾時圖竄撲畿
疆兼擾豫境該大臣亟應嚴行扼剿隨卽由東昌曹州等處節節
前進方爲妥善見在濮范等處匪徒尙未撲滅該大臣惟當督兵
實力埽蕩先清畿輔切不可任令教捻各匪四出蔓延以致難於
收拾將此由六百里各諭令知之○袁甲三奏苗沛霖知提督李
世忠等軍行抵壽境之姚家灣故撤城圍以懈城內人心並句結

城內奸民作爲內應乘九月二十六日風雨於夜間攻城放火焚燒城上更棚官軍未及準備該逆遂於二十七日入城臣正飛催李世忠進剿旋據前敵來稟李世忠以壽城已破賊勢愈張沿淮反正各圩咸懷觀望我軍深入勢成孤懸且苗沛霖死黨麇聚懷遠近有添調黨與由懷遠以西過河乘虛徑撲臨淮之說不得不回顧根本先攻懷城以遏北竄二十九日將城南賊營三座攻毀擒斬四五百人並添築營壘以杜逆匪往來之路臣查李世忠與苗沛霖誓不兩立所籌回攻懷遠占下游形勝再圖進取亦屬目前最要機宜見飭會同編修袁保恆趕緊圍攻以孤賊勢臣一面於後路各要隘嚴密布置至壽州被逆練闌入臣未能先事妥籌咎無可辭應請旨將臣交部嚴加議處李世忠係幫辦軍務之員親自督隊未能先期趕到亦有應得之咎並請交部議處又奏接

翁同書來函並閱壽州鳳臺等州縣公稟苗練進城後未肆殺戮衙署倉庫監獄均未損傷且進謁城內各官婉言請罪尙知顧惜名義並云苗沛霖止求辨明曲直並非叛逆仍願勦賊立功所屬練眾亦一律薙髮勝保委員方模勦早經行抵壽城查看一切見仍力爲剖白以爲招撫之計查苗沛霖欲避叛逆之名懇請投誠果能真心悔罪原不妨權宜辦理究竟有無把握翁同書來函未經明言臣已覆令相機辦理務須操之在我不至再有反覆方爲妥善一面仍攻懷遠暫緩進兵壽州又奏據壽州委員陳之琦面稟壽城未破以前苗練本有撤隊讓出糧道俟勝保李續宜到後再判曲直之語查勝保與苗沛霖時有信函往來見在勝保已委員至壽州想能妥爲辦理至李續宜本欲迅速來皖見在楚北肅清聞該撫已到楚皖交界之巴河一帶臣當專函諄催並請旨飭

催李續宜剋日來皖與臣會辦勦撫事宜 上諭袁甲三奏苗練
攻破壽城並仍請就撫各摺片苗沛霖以見任道員輒敢挾怨謀
叛其罪萬無可貸前因與徐立壯孫家泰仇讐率眾攻壽經翁同
書將徐立壯正法孫家泰監禁該練仍未撤圍卒陷壽城反覆情
形本難概信見在破城之後仍復求撫是否有挾而求抑或另有
詭謀著袁甲三翁同書李世忠悉心斟酌如苗練尙係真心求撫
則值此皖豫多事之秋不妨暫爲羈縻從權辦理儻必不可撫卽
著據實具奏毋稍遷就彭玉麟前已補授皖撫於地方情形自必
留心訪察李續宜曾經駐紮楚皖交界地方督勦軍務楚皖唇齒
相依尤當力籌兼顧見在楚軍能否前赴壽州苗練是否可撫如
必須勦辦則袁甲三兵力尙單楚軍能否分撥勁旅助勦之處均
著該撫等妥爲商酌迅速覆奏總之見在兵單餉絀髮捻未平多

興一波更形棘手苗練入城後既未焚戮且練眾均皆薙髮似尙有一綫可原若量從寬免予以自新則移我兵力專辦髮捻各匪於大局當有裨益諒袁甲三等必能通盤籌畫計出萬全也袁甲三自請嚴議並請將李世忠議處均著加恩寬免將此由六百里加緊各諭令知之○諭袁甲三奏援壽官軍行抵壽東與南路練民約期進剿忽探苗逆句結內應乘雨夜破城一摺壽民知李世忠等援軍已到本可固守以待乃因內應變起倉卒被苗練乘城襲入實堪痛恨又據片奏接翁同書委員齎函並壽州鳳臺二州縣公稟苗練進城於衙署倉庫監獄均未損傷亦未肆行殺戮且進謁各官均言請罪並云苗沛霖止求辨明並非叛逆仍願剿賊立功所屬練眾亦一律薙髮等語苗練反覆理宜痛剿惟兵力未足相制如其尙有顧惜名義之處亦或可以暫事羈縻勝保係原

招撫之人與苗沛霖時有稟函來往必應知其底蘊此事所關非細刻下情形究應如何辦理勦撫孰宜受撫之後有無把握該大臣務須悉心妥籌切實具奏將此由六百里加緊諭令知之○丁卯 上詣 大行皇帝几筵前行啟奠禮○諭內閣從來致治之道必先澄敘官方未有大法小廉而海宇不底於乂安者也我皇考大行皇帝優禮大臣 加惠耆舊下至遠方牧令 詔書褒美 恩誼至爲周浹肆予沖人誕膺 景命所賴內外大臣同心協贊無曠庶官爾內外大臣歷受 知遇或登卿貳或任封圻此先帝所畱貽用以保乂我邦家其能公忠體國者尙不乏人乃積習相沿往往知有身家罔顧國事甚至汲引私人苞苴賄賂殊負朝廷委任之意因而各部院衙門司員但知逢迎長官夤緣干進外而藩臬道府州縣亦皆養尊處優營私舞弊置地方民生於

不問朕雖未能周知爾諸臣清夜自思能無抱愧耶朕於爾中外大小臣工視同一體愛惜保護惟恐弗至自茲以往京外大吏務各公廉自矢毋負 皇考簡用之恩思所以永保令名長承恩眷其各屬員及地方官吏等亦各砥礪廉隅各勤職事如有仍前錮習私計自營或玩誤公事不能振作者一經參劾朕必執法嚴懲勿謂言之不早也凡我臣工其敬懍之毋忽將此通諭內外臣工知之○諭袁甲三奏剿賊獲勝見飭駐防員弁加意防範等語提督李世忠由滁州督隊起程行至嘉山集地方突有天長來安髮捻橫截去路經該提督揮隊迎剿賊向滁州分竄十六日賊圍滁州經副將李照宸等出隊迎擊殲賊四五百名生擒二百餘名賊眾分路竄散剿辦尙爲得手著李世忠飭令在事員弁嚴密防剿盡殲醜類以靖地方而免勾結○諭御史劉毓楠奏參玩誤廢事

之大員請旨罷斥查辦一摺河南布政使邊浴禮職任監司當此
捻匪竄擾之際宜如何悉心籌畫多方設備乃性耽安逸諸務廢
弛縱子攬權納賄迫賊臨城下毫無籌備以致附郭各村莊慘遭
荼毒似此膜視民瘼若不立予罷斥何以儆官邪而慰民望邊浴
禮著卽革職交嚴樹森查辦具奏○諭議政王軍機大臣等昨日
已特降諭旨將熱河一切未竟工程停止矣該處山莊修葺各處
工程其所需銀兩已經領過若干作何銷算之處著春佑嚴行查
詢總管毓泰等悉數呈報不許稍涉徇隱儻有諱匿必當重治其
罪毋得以泛泛具結遂謂可敷衍了事也至所奏查鈔肅順熱河
寓所情形單開房間家具數目著卽照數入官交毓泰等妥爲收
管將此諭令知之○申諭各直省毋得奏畱軍務省分人員○添
派大學士周祖培刑部尙書綿森恭辦 平安峪工程○以鄭元

善爲河南布政使王榮第爲河南按察使

由彰衛懷道遷

○戊辰奉移

大行皇帝梓宮安於觀德殿

上始居養心殿

○諭內閣軍興以

來於今十載百姓慘罹兵燹顛沛流離我

皇考大行皇帝勤求

民瘼命將出師

宵旰焦勞無日不欲出斯民於水火是以

軫

恤戎行訓勵將士多方誥誡至再至三卽一戰之捷一城之拔無

不立沛

恩施俾知感奮凡所以整軍經武期與斯民共樂昇平

者固天下臣民所共見共聞也各路帶兵大員身受

皇考厚恩

畀以重任果能各矢公忠滅此朝食蠢茲小醜豈難迅速蕩平乃

近來將帥中深明紀律所向有功者固不乏人而沾染積習者亦

復不少或粉飾奏報或觀望遷延賞罰則輕重失平糧餉則侵漁

入己甚至意見不和以致事機坐失縱寇殃民種種貽誤朕卽不

重治其罪伊等清夜自思其能仰答

先帝之恩否耶嗣後各路

統兵大員務當勦力同心痛懲諸弊嚴明賞罰以勵軍心愛養士卒以聯眾志毋分畛域致此勦而彼竄毋事欺罔致掩罪而冒功儻能同仇敵愾迅奏膚功則行賞論功朝廷自有酬庸之典如敢仍前玩泄或軍無紀律以致騷擾良民則典刑具在朕亦不能曲法以示恩也將此通諭各路統兵大臣督撫提鎮知之○補行咸豐十年 恩科武會試○庚午 上詣觀德殿 大行皇帝几筵前行大祭禮○諭內閣朕奉 母后皇太后 聖母皇太后懿旨列祖 列宗豐功偉烈振古鏖今載在 實錄 聖訓炳若日星向由內閣每日恭進奉爲 成憲朕以冲齡踐阼尤應朝夕循誦以爲法守著仍照舊章分日恭進用資講習至見在內外庶政均賴兩宮 皇太后躬親裁定並承 慈命將歷代帝王政治及前史垂簾事蹟著南書房上書房翰林等擇其可爲法戒者據史

直書簡明註釋彙爲一冊恭呈、慈覽該翰林等於彙纂成書後均著交議政王軍機大臣覆看再行繕寫進呈○諭朕奉 母后皇太后 聖母皇太后懿旨朕以冲齡踐阼亟宜典學以端蒙養之基見在師傅惟李鴻藻一人尙須博訪老成端謹學問優長之士同資輔導而裕性功著議政王軍機大臣大學士翰林院掌院學士共舉所知無論曾任見任及官階大小擇其足膺是選者奏保數員以備簡用○諭御史徐啟文奏樞機重地責無旁貸請責成議政王軍機大臣實力劄襄母避小嫌中外臣工均應拾遺補闕隨時陳奏等語朕奉 母后皇太后 聖母皇太后懿旨載垣等干預政柄皆由匡贊諸臣遇事唯諾實階之厲恭親王以朕叔膺議政王重任桂良等亦皆以 先朝舊臣簡受要職自無不力矯唯阿之習惟以責任過重如該御史所奏恐以敬畏太甚或近

趨承不爲無見值此四方多難惟賴親貴重臣弼予邦治該王大臣等仰蒙兩宮 皇太后特旨簡任任務各協力同心勉圖康濟母避任事之小嫌共矢公忠之大節至中外臣工於時事闕失均宜直言無隱卽議政王軍機大臣等贊理庶務如未能盡協機宜亦准其據實指陳毋稍瞻顧以期力挽頽風共臻上理○諭御史鍾佩賢奏請崇節儉以裕度支等語朕奉 母后皇太后 聖母皇太后懿旨前經諭知總管內務府大臣所有應行添製金銀器皿等件詳覈辦理覽該御史所陳甚合崇儉黜華之意況見在軍興日久度支告匱供億輸將閭閻力竭興言及此卽菲食惡衣猶覺難安寤寐朕仰承 慈訓惟當躬行節儉何敢稍涉紛華嗣後一切服御用物有可以節省裁撤者著總管內務府大臣隨時奏聞以副朕意○諭御史鍾佩賢奏請甄汰保舉以慎名器並御史卞

寶第奏請嚴賞罰肅吏治慎薦舉各等語軍興以來已逾十載因念各將士效力疆場鋒鏑慘罹一經各統兵大臣直省督撫奏請獎敘無不立沛恩施惟其中認真出力者固不乏人而濫竽充數者亦復不少總由各統兵大臣不能破除情面以致鑒別毫無薰蕕雜進並有超躐而升不數年而洊擢顯職其貪污不職者又不能卽時參劾至在京部院司員該堂官不能隨時考察至以聞茸無用之員濫厠曹司殊非慎重名器之道嗣後各路統兵大臣務當賞罰嚴明於軍營出力各員秉公覈實奏請獎敘其有喪師失律者必當覈其功罪是否足以相抵方准棄瑕錄用平日遇有貪劣之員尤當隨時奏劾儻稍涉徇庇朕必予以重懲其各部院庸劣不職之員並著該堂官隨時裁汰用副朕綜覈名實之至意○諭議政王軍機大臣等寄諭欽差大臣勝保苗沛霖襲破壽州虛

言辨明曲直仍請罪就撫而又暗約黨與欲犯豫疆反覆情形實難概信潁郡爲中州門戶且城關居民向係黨附苗練設苗沛霖加以偪脅反側潛滋賈臻存營兵勇僅三千人難與抵拒儻潁郡有失不惟淮北之地全將淪陷且深入豫境事將不可收拾勝保委員方模勳已抵壽州一切狡謀自必探悉應勦應撫該大臣諒籌之已熟見在東省餘匪有僧格林沁譚廷襄分路勦辦該大臣能否南下辦理招撫事宜卽著妥速議奏目下情形刻不容緩是否可暫事羈縻且受撫之後有無把握該大臣務當計出萬全毋爲所愚將此由六百里諭令知之○諭賈臻奏壽州失陷苗逆所畏惟勝保一人請飭迅速南下等語見在東省亦屬防勦喫緊勝保能否南下本日復諭令該大臣妥籌速奏矣苗逆勢甚鴟張該署撫身任封圻勦匪是其專責務當相機堵禦力遏兇鋒並須固

守潁州不可稍有疏失所請從重治罪之處著加恩改爲交部議處將此由六百里諭令知之○諭譚廷襄奏東昌曹屬匪徒肆擾兵勇不敷分撥請飭僧格林沁回軍直抵曹屬並分撥馬隊赴東昌合勒等語此時東省軍務自以勦辦東昌及曹屬各匪爲最亟本日已諭知僧格林沁派兵兼顧譚廷襄惟當就見有兵力酌量分撥前赴東昌等處會合僧格林沁派出兵勇合力勦辦毋令滋蔓將此由六百里諭令知之○馮子材奏署江甯將軍京口副都統巴棟阿辦理鎮江軍務籌防籌勦不遺餘力旋以積勞成疾於九月二十日因病出缺見當軍務喫緊之時相應請旨簡放熟悉東南情形之大員星速來鎮以重職守並懇恩飭部將巴棟阿照軍營病故例從優議卹又奏丹陽句容等處賊黨日增逆首陳玉城由金陵率賊四五萬會合各股聚集寶堰白兔地方逆目滿天

義又帶有宜興溧陽金壇賊眾二萬意圖合撲鎮城亟應乘機剿辦惟一經進兵則根本之地必賴大員鎮守臣查前署大名鎮總兵官馬德昭見在清淮就醫病已痊愈該總兵練達戎機威望素著與臣共事多年知之最深見當防剿喫緊之時合無仰懇 天恩俯准以總兵馬德昭幫辦鎮江軍務俾臣得資臂助實於軍務大有裨益如蒙俞允臣卽知照該總兵速赴鎮防 上諭寄諭督辦鎮江軍務馮子材見在丹陽句容等處賊數日增逆首陳玉城等大股聚寶堰白兔地方意圖合撲鎮城自宜乘機進剿爲先發制人之計該總兵督辦軍務責無旁貸著卽激勵兵勇分路進攻一面固守鎮城勿得稍有疏失並知照馬德昭令其速赴鎮城幫同辦理會商戰守機宜鎮江與揚州兩城相距甚近該總兵務宜與江北軍營聯絡一氣以期互相援應毋誤事機將此由六百

里諭令知之○命甘肅西甯鎮總兵官馮子材督辦江蘇鎮江軍務以陝西陝安鎮總兵官馬德昭幫辦軍務○予軍營病故署江甯將軍巴棟阿照將軍例賜卹查明子嗣幾人俟服闋帶領引見○予山東陣亡署總兵官郝上庠祭葬世職○辛未官文曾國藩李續宜奏苗練圍攻壽州勢甚猖獗自應聲罪致討惟查安慶各城雖經克復而曾國荃一軍分守懷甯廬江進規無爲多隆阿一軍分守桐舒二城圖取廬郡防勦正當喫緊未敢稍形鬆懈湖北雖漸肅清隨州一城尙爲逆賊踞守亦須畱兵嚴防臣等往返面商酌於臣李續宜援鄂軍中抽撥提督成大吉總兵蕭慶衍道員蔣凝學等統率馬步官軍馳往霍山六安擇要扼紮既可屏蔽鄂江門戶且與壽州相距匪遙聲勢亦能聯絡如鄂境竊安或曾國荃多隆阿兩軍辦理得手卽當相機進勦以期仰紓宸廑上

諭議政王軍機大臣等據官文等奏遵派成大吉等統率馬步官軍馳往霍山六安地方擇要駐紮與壽州聯絡聲勢各等語所辦甚爲妥協苗沛霖自破壽城後意圖西竄豫疆分股撲犯陳州光固等處見在成大吉等已抵霍六等處李續宜想亦仍遵前旨駐紮楚皖之間均與壽州相距不遠如果該練尙有可撫之機見我兵威較盛則兇燄自戢袁甲三等辦理撫事亦可較有把握若仍肆反覆即可會商袁甲三李世忠迅速進兵會合夾擊著官文等飭令帶兵各員酌量情形妥籌辦理其曾國荃多隆阿兩軍如果辦理得手並著催令前行相機協剿將此由六百里諭令知之○諭有人奏東南軍務緊要請嚴飭督兵大員速籌進剿並請密查江浙撫臣能否勝任一摺江浙所屬郡縣爲東南財賦之區豈容任賊久踞曾國藩駐軍安慶規取金陵若得江浙兩省撫臣併力

進攻自不難將被陷城池次第收復薛煥前在蘇州府任內聲譽頗著惟督帶兵勇或恐非其所長且前據有人奏該撫在上海偏隅自固日享安福等語如果屬實卽不能勝此重任浙撫王有齡頗有才具前任蘇藩時雖尙能籌辦軍餉惟於浙撫一缺未知能否勝任以上二員均著曾國藩悉心察看據實具奏又另片奏東南軍務需才孔亟請飭曾國藩酌量保奏等語該大臣久歷戎行見聞較廣著擇其智勇兼全堪勝封疆將帥之任者酌保數員聽候簡用原摺片均著鈔給閱看將此由五百里諭令知之○諭前據田興恕奏報逆首汪潮青等攻撲銅仁該地方文武督率楚黔各軍連獲勝仗將全股剿除淨盡並將署知府沈丙瑩等請獎業經降旨允准茲有人奏據該提督所咨奏報各情形與該地方稟報不同難保無憑空結撰行其欺罔等語田興恕身起行間不數

年閒經 大行皇帝擢至提督近因江忠義簡授貴州巡撫一時未能到任復令暫署撫篆宜如何殫竭血誠力圖報效乃銅仁奏報摺內以並未出境之陸傳應董仲孚二員稱爲越境勦賊且五六兩月銅仁未有土匪該提督摺內稱有無數大戰楚省並無派兵赴黔之事該提督指鎮標兵二百名爲五百名種種不符殊堪詫異朕每聞田興恕於帶兵打仗驍勇善戰尙有可取惟身爲統帥奏牘一切須藉人手受其蒙蔽亦所不免著田興恕卽將摺內所指奏報銅仁軍情各節是否被人欺蒙抑或尙有別情迅速確查明白回奏如果奏報不實卽自行檢舉痛戒將來朕尙可因其不怙己過予以原宥儻自護前非仍思文飾則是有意欺罔恐難當此重咎也懍之原摺著鈔給閱看將此由五百里諭令知之○以沈桂芬爲禮部左侍郎

田內閣學士遷

○以江西廣信等城解圍予提

督鮑超優敘○壬申 上詣觀德殿 大行皇帝几筵前行月祭

禮○諭內閣勝保奏攻剿大股教匪疊獲勝仗一摺教匪楊幅淩等竄擾數州縣頗形猖獗經勝保調派總兵成祿等相機進剿將薛店等處賊巢平毀斃賊一千餘名該匪紛紛敗竄其撲擾臨清一股經都司王佐臣剿擊復斃賊數百名餘匪向南敗竄著勝保卽飭該鎮將乘此聲威跟蹤剿洗務將此股餘匪殲除淨盡其濬滑一帶竄匪仍著相機協剿以期肅清河北免致蔓延○諭苗沛霖以一練總蒙 皇考大行皇帝再造深恩破格錄用擢至道員該革員本忠義自將亦有材勇曾於鳳陽等處剿賊立功乃因與徐立壯等尋仇肆殺輒敢擁眾圍攻壽州據該地方大吏奏聞跋扈情形朕不得已將其革去四川川北道並布政使銜拔去花翎飭該統兵大臣等迅速懲辦茲據袁甲三翁同書厯次奏聞苗沛

霖自入壽城並無滋擾殺害平民之事進謁地方大吏自稱受恩圖報不敢二心其挾忿尋仇乃出眾練之意止求辨明心迹入城練眾亦卽奉令出城斂兵待罪又有壽州生員傅汝霖等數十人公呈具保該革員並非叛逆等語情詞至爲懇切朝廷賞功罰罪一秉至公本無成見苗沛霖如果真心悔過情願帶兵剿賊著卽趕緊立功自贖朕必仍當重加賞擢予以自新如中懷反覆則朝廷之法亦不能再爲曲宥並將該大臣等徇庇之罪從重懲處○諭議政王軍機大臣等本日有人奏浙省軍務不振請另簡賢員督辦一摺浙省賊氛日熾甯紹兩郡情形較爲喫重必得謀勇兼備大員統兵援救可期漸有起色鮑超追剿賊匪已抵廣信如江西全境肅清卽著該總兵前赴浙江督兵進剿左宗棠一軍能否抽撥並著曾國藩相機籌辦王有齡疊被參劾其平日不治輿情

已可概見著該大臣仍遵前旨確切查明迅速具奏又有人片奏江蘇巡撫薛煥娛情古玩不理軍務其總辦糧臺之金安清聲名狼藉恃與薛煥拜認師生任意侵蝕糧餉各等語並著曾國藩秉公確切查明一併據實覆奏毋稍徇隱原摺片著鈔給閱看將此由五百里諭令知之○翁同書奏壽城紳練互殺一案起釁之後孫家泰糾徐立壯以爲援徐立壯又勾捻匪以爲援經臣將徐立壯剿捕伏誅內患旣除適張學醇等到壽設法和解卽將撤隊解圍詎意有在籍遊擊朱景山會同副將黃鳴鐸遊擊吉學盛阻撓撫議捐貲募勇必欲背城借一無知之人皆附和之決意主戰凡從前議撫者皆視爲仇讐致官兵無立足之地總兵博崇武慶瑞尹善廷突圍南去彼此聲息不通旋得袁甲三來函始知該三鎮紮營二十里外之雙橋集朱景山以訪拏奸細爲名擅殺守備張

永勝披甲明成跋扈異常城中乏食軍民餓死大半其逃出城者
苗練盡皆收養並無傷害在城者僅餘老弱朱景山閉城撤橋迫
令固守漸生怨望九月二十六日黃鳴鐸朱景山恐禍將及開城
逃遁團練悉潰苗練乘閒進城未將無辜良民殺害所殺無非仇
人及勾捻之人次日苗沛霖親至東門見擄掠者斬殺數人人心
乃定且徧告紳民謂伊受恩圖報並無二心其挾忿報復乃出自
眾練之意止爲尋仇而來並非爲攻城起見二十八日苗沛霖來
謁馴謹如常乞爲代奏以表心迹並據壽州文生傅汝霖等四十
餘名呈稱苗練進城復仇其餘民人無一殺害次日盡出城外並
非叛逆等語查苗練之仇已雪其心可明見當用人之際與其使
數十萬眾化而爲賊孰若收數十萬眾轉而擊賊儻蒙 聖恩矜
全卽明降諭旨發交袁甲三轉行卽可期其罷兵助戰理合據情

上額恭候 聖裁 上諭昨因袁甲三奏稱苗練攻破壽州未肆
殺害並有求撫之意當以勝保係原招撫苗沛霖之人必能知其
底蘊究竟此時勦撫孰宜寄諭該大臣妥籌馳奏本日又據翁同
書奏壽城圍練力阻撫局所辦迄無成效以致民人餓死眾怨沸
騰內訌潰散之餘苗練乘閒進城報復並未殺平民且求爲具奏
以明心迹一摺所陳苗練情形本有可原此次入城後更爲馴順
等語勝保接奉前諭於此事或勦或撫必已妥籌務卽酌度萬全
趕緊馳奏其李世忠一軍見在籌攻懷遠前據袁甲三奏該提督
忠義奮勇與苗沛霖誓不兩立如此時苗沛霖誠心歸正朝廷方
且加之曲宥予以自新該提督諒能頓釋舊嫌以全大局或苗練
實屬狼子野心仍懷叵測李世忠能知其底蘊必不可撫亦卽稟
商袁甲三決計勦辦勝保於李世忠恩信素孚著將此諭卽由該

大臣轉傳知悉可也將此由六百里諭令知之○諭翁同書奏壽城團練內訌潰散苗練乘間進城報復並未殺害平民求爲具奏以表心迹一摺並有如蒙恩准祈降明發諭旨發交袁甲三轉行卽可期其罷兵助勦於大局不無補救等語苗練反覆理宜主勦止以髮捻紛乘兵力不敷勦辦不得已而暫事羈縻姑從所奏發去諭旨一道交袁甲三收存務須熟察苗練如果真心歸正卽令立功自贖然後再將此旨宣示仍卽馳奏並將發去原旨繳回再行發鈔傳布惟以後苗沛霖如再反獲朕卽惟該大臣等是問如係翁同書爲其所制不得已代爲乞請或苗沛霖知楚軍已來姑爲搖尾乞憐以作緩兵之計種種情僞不可不防該大臣等當仍遵前旨妥籌勦撫孰宜之策或卽飛約彭玉麟李續宜等撥兵相助以圖萬全惟在該大臣等相機而動毋失機宜將此由六百里

諭令知之○癸酉諭內閣前因太監杜雙奎有與肅順結交情事交慎刑司審訊茲據總管內務府大臣督飭該司員等審明定擬並究出太監袁添喜等均有與肅順往來之事一併定擬罪名具奏此案座鐘處太監杜雙奎擅往肅順私寓修理鐘表甘心服役得受錢糧寶屬大千例禁雖經將肅順交存鐘表自行呈出未便稍從末減杜雙奎著從重發往黑龍江給官兵爲奴遇赦不赦總管太監袁添喜因地畝之事向肅順託情並與杜雙奎進京時屬令探聽風氣意圖干預外事亦屬有違例禁著革去總管從重發往黑龍江給官兵爲奴總管太監王喜慶與肅順交往餽送食物收受銀兩迹涉交結著革去總管發往打牲烏拉給官兵爲奴太監張保桂劉二壽送給肅順食物並得受賞銀寶屬不合均著發往吳甸一年期滿劄發順天府安插爲民至肅順交結近侍心存

叵測該太監等迫於威燄意存迎合均屬罪由自取見已將杜雙奎等從重懲辦足以示儆此外自無庸再事株求以昭寬大該太監等惟當益加馴謹勤慎當差儻敢不知遠嫌再有干預外事及與廷臣交結情弊亦必重治其罪不能寬貸其各懷遵著內務府大臣卽將此旨傳諭總管太監等知之○諭欽差大臣兩江總督曾國藩著統轄江蘇安徽江西三省並浙江全省軍務所有四省巡撫提督以下各官悉歸節制浙江軍務著杭州將軍瑞昌幫辦並著曾國藩速飭太常寺卿左宗棠赴浙江勦辦賊匪浙省提鎮以下各官均歸左宗棠調遣○諭瑞昌王有齡奏浦江義烏東陽被陷一摺浙江逆匪圍攻浦江縣城經總兵文瑞等帶隊迎擊疊獲勝仗嗣因該逆愈聚愈眾我軍被圍遂於八月二十三日浦江縣城失守該逆復率大股直撲五指山等處金華大股賊匪踵至

我軍迎勦失利義烏東陽復於二十六七等日相繼被陷浦江被圍日久嗣以糧盡援絕遂致失事該縣帶兵各員情尙可原均著免其置議已革總兵米興朝暫革副將吳再升節節潰退以致義烏東陽二城疊陷厥咎甚重米興朝本係發往軍臺之員著改發新疆效力贖罪吳再升著拔去花翎撤銷巴圖魯名號以守備降補浦江縣知縣恩福於失守縣城之前先行出城未能隨同守禦著革職拏問署東陽縣知縣張用錫雖無聞警先逃情事惟不能力保城池究有應得之咎著暫行革職仍責令勸辦團練會同官軍追勦以贖前愆署義烏縣知縣甘履祥越境交印實屬有心規避該員應得處分及此外文武各員下落均著瑞昌王有齡查明分別參辦仍著督飭各軍分投進勦迅圖克復各城毋任久踞○諭劉長佑奏潯州首逆就擒並堵勦石逆獲勝一摺本年七月間

官軍克復潯州後逆首陳開竄至大灘經知縣陳璠等設計誘擒就地正法貴縣踞匪亦經蔣益澧設法招撫當將縣城收復其石達開股匪退至龍山經劉坤一等督率民團連破數寨石逆受傷逃竄計共斃賊千人辦理尙爲得手著卽乘此聲威迅掃賊氛毋任他竄○諭田在田奏擒匪畏罪投誠並將倉里等處收復一摺擒首李得金竄踞倉里經官軍疊次圍攻西路老捻殲斃殆盡其踞宋疇圩之李得銀來營悔罪是夜圩內火起李得金等將逆首張憨等二百餘人大半格殺率其家屬出圩投誠長髮老捻概行擒獲當將倉里宋疇兩圩收復辦理尙屬妥速除李得金等准其免死隨營責令自效外所有在事出力之文武員弁著田在田覈實保奏毋許冒濫○諭議政王軍機大臣等寄諭欽差大臣僧格林沁田在田奏倉里宋疇兩圩業經攻克擬赴僧格林沁軍營面

商侯續股竄匪擊回卽與該大臣分兵南下等語徐州軍務見當辦理得手之時自宜乘此聲威分兵南下直抵臨渙老巢迅速掃蕩爲永除後患之計見在曹縣東昌固須分兵兼顧而徐宿進兵機宜亦不可失如果兵力尙能分顧著卽分撥馬隊交田在田管帶進攻乘此破竹之勢迅拔滄南老巢以期一鼓蕩平諒該大臣必能統籌全局不至坐失機宜也將此由六百里諭令知之○諭瑞昌王有齡奏浙江賊勢猖獗請飭左宗棠督辦浙江軍務等語逆首李秀城大股及江西湖坊等賊盡驅入浙加以僞侍王李侍賢大股盤踞金華一帶見已攻陷嚴州府城及浦江義烏東陽餘杭新城等縣勢必直撲省城旁竄甯紹幾於全浙糜爛浙省不保則金陵蘇常甯廣之賊得以進退自如且徽州廣信必遭肆擾其患曷可勝言本日已明降諭旨令曾國藩節制江浙全省軍務並

令江蘇安徽江西浙江巡撫提鎮以下各官悉歸節制該大臣自不能不統籌兼顧況安慶已經克復湖北江西軍情亦有起色自不至有顧此失彼之虞著曾國藩卽飭左宗棠帶領所部兼程赴浙督辦軍務以圖挽救東南大局至都興阿見在江北勦辦粵匪袁甲三見在皖北勦辦捻匪遇有緊要軍務已諭令該將軍等會商曾國藩辦理其江北皖北地方文武該將軍等諒亦時有調遣之處並著曾國藩諭令該文武等仍遵都興阿等調遣不得因已歸該大臣節制於都興阿袁甲三派辦公事稍涉玩視左宗棠入浙之後所需糧餉軍火浙江力難猝辦著毓科先行籌撥銀十萬兩解交應用於浙省代墊江西援軍口糧項下如數劃還並著慶端瑞璜按月籌銀十萬兩同軍火等項一併源源接濟毋許遷延推諉致誤事機將此由六百里各諭令知之○諭前經 皇考大

行皇帝授袁甲三爲欽差大臣勦辦捻匪都興阿督辦江北軍務勦辦粵逆該大臣等駐兵日久尙無成效此次朕特簡曾國藩統轄四省軍務皖北江北仍責成袁甲三都興阿辦理該大臣等務當督同李世忠賈臻黃彬於地方應勦應防事宜相機妥辦不得稍涉推諉該大臣等受國厚恩惟當共濟艱難力圖掃蕩毋許各存意見致誤事機將此由六百里各諭令知之○諭瑞昌王有齡奏浦江義烏東陽嚴州餘杭等城失守請飭左宗棠赴浙督辦軍務各摺片浙省軍情日形危急總由瑞昌等於帶兵將弁不能破除情面認真督飭以致臨敵潰退城池相繼失守見在左宗棠能否赴浙尙在未定該將軍等惟當就見有兵力妥爲分撥嚴行扼截毋任賊匪再得深入張玉良屢次僨事因念其從前克復杭城之功姑照瑞昌等所請准予免議儻再不知奮勉致有挫失定當

重治其罪不能寬貸將此由六百里諭令知之○諭前因浙江軍務喫緊疊經諭令慶端撥兵援救並令該督親往督勦嗣據慶端等奏稱援浙諸軍除道員張啟煊馮席珍等業已抵浙外見復派員雇募臺灣壯勇二三千名候調仍恐緩不濟急復派都司許忠標等挑募詔安等壯勇一千名剋日馳赴金華至該督能否赴浙尚未據覆奏見據瑞昌等馳奏嚴州浦江義烏東陽等府縣城池相繼失守情形危急自須速籌援應著慶端等卽飭都司許忠標等星馳前進並將臺灣壯勇速行調募勿再遲緩張玉良等屢戰屢潰萬無足恃尤須得力大員前往統率總兵曾玉明林文察二員前據該督等奏稱因順昌沙縣土匪復熾未能赴浙如見在情形較鬆卽著於該二員中派一員星馳前往浙江以資勦辦慶端兼轄浙省責無旁貸能否親往督勦並著斟酌辦理浙省面面皆

賊各省協餉無路得達惟閩粵兩省尙有海道可通著文清慶端瑞瑣將閩海欠解餉銀八萬兩勞崇光耆齡將粵海關撥解銀兩均卽如數籌撥剋日派委委員由海道解赴浙江應用毋得稍涉遲延致滋貽誤將此由六百里各諭令知之○癸酉允戶部請飭江蘇採買米二十萬石裕倉儲○申諭嚴緝盜匪從重定擬罪名○申諭崇文門監督嚴禁差役需索行旅○調直隸陝甘兵各一千名赴江南勦賊○甲戌諭議政王軍機大臣等勝保奏苗沛霖以撫之爲宜果由該大臣一手經理可保不生枝節惟須先降恩旨方能著手等語苗沛霖居心叵測本難馴伏第因皖豫正值多事之秋旣據翁同書代爲剖明心迹則乘機籠絡未始非因時制宜之策勝保旣稱一手經理可無枝節自較袁甲三爲有把握第北路防剿至關緊要見在大名等屬曾否肅清東省竄匪能否不

至再有蔓延勝保離營以後如有得力大員可以暫統諸軍無誤防剿卽著該大臣速赴穎壽將安撫苗練事宜妥爲辦理所有前交袁甲三諭旨一道卽照繕寄交該大臣收存果使苗沛霖心悅誠服可無反側該大臣卽將此旨宣示並將詳細情形馳奏該練人數不少應如何遣散以免後患卽著豫爲籌畫不可令其再有反覆儻苗沛霖藉求撫之名多方要挾亦須顧惜大體不容遷就該大臣諒能斟酌盡善無待諄諭此行係爲議撫惟須帶親軍小隊前往部下馬步各軍均著畱營以重北路軍務將此由六百里諭令知之○乙亥諭內閣前據睿親王仁壽等遵議 皇考大行皇帝 郊祀配位與廷臣所議歧異本日禮親王世鐸等奏遵議郊祀配位典禮一摺仁壽等又復列銜事關大典有無遷就之處著睿親王仁壽醇郡王定郡王溥煦尙書綿森伊勒東阿侍郎

伊精阿左副都御史富廉另行具奏以昭慎重○諭議政王軍機大臣等昨據嚴樹森奏稱苗練於破壽城後擬分黨西竄賈臻株守潁城已成坐困見在楚境肅清謫飭官文等撥隨州兵勇取道豫境由信羅光固前進或撥黃州兵勇取道麻城由商固前進均由三河尖馳援潁郡規復壽州並令彭玉麟親統而行各等語苗沛霖自破壽州後意圖西竄若潁郡有失則楚豫均受其害嚴樹森雖派兵前往尙未能迎頭截剿如果苗沛霖以求撫爲名冀緩我師自當合力痛剿豈可坐失事機若眞悔罪輸誠亦當解散黨與以孤其勢庶操縱得以在我不至任其要挾著官文曾國藩彭玉麟李續宜等悉心籌商彭玉麟見在安慶是否能由楚境援潁黃郡隨州之師是否可以分撥務當統籌大局商酌覆奏不可稍涉大意致有貽誤將此由六白里各諭令知之○諭聯捷等奏濮

范股匪勢甚猖獗請飭下毛昶熙移軍河北親歷各處查看辦理等語河北地方緊要濟淇等縣爲直豫南北往來大道嚴樹森接奉前寄諭旨諒卽趕緊派兵剿辦其河北各屬團練當此警報頻聞本鎮牛浩然調赴河南彰衛兩營存兵無幾自應一律興辦藉資民力以衛地方毛昶熙駐軍宋郡當皖豫之交羣捻縱橫見在情形是否能卽移軍河北著嚴樹森毛昶熙妥籌辦理毋致顧此失彼稍有疏虞河北團練著卽設法飭令地方妥辦濟滑淇汲等處竄匪並著派撥兵勇速籌剿洗迅卽馳奏以慰廑懷正在寄諭閒據嚴樹森馳奏濮范股匪由東境竄擾豫疆見派兵勇迎擊並聯捷所帶防河之師不能禦賊請旨裁撤各一摺嚴樹森身膺疆寄原應督率沿河地方官吏嚴行防剿以專責成所稱豫省河岸責成該撫嚴督沿河道府州縣認真扼防遇有警報由該撫隨時

簡派勁旅相機調度覽所奏情形似係確有把握諒必不以空談塞責本日業經寄諭直隸山東山西三省均著照該撫所陳各責成沿河一帶各地方官認真防守毋得再有一賊偷渡黃流致干重咎俟三省覆到再將專設防河之員裁撤以一事權嗣後河防卽惟各該疆吏是問將此由六百里各諭令知之 諭聯捷段晴川奏濮范股匪竄由內黃至滑縣濬縣等處聯捷已抽撥練勇激勵鄉團藉資彈壓並請飭毛昶熙移軍河北等語當卽寄諭嚴樹森毛昶熙妥籌辦理並令將河北團練妥爲舉行以衛地方河北地當孔道汲淇延津等縣均地屬濱河聯捷防河是其專責仍應就所有兵練實力堵剿毋令賊蹤延蔓以固藩籬將此由五百里諭令知之○丙子諭內閣本日大學士九卿會同議上 康慈皇太后 尊諡敬請 升祔 太廟並據請將前上 尊諡敬謹改

擬並請加至十二字以表尊崇本日朕奉 母后皇太后 聖母

皇太后召見議政王奕訢軍機大臣大學士桂良尙書沈兆霖侍郎文祥寶鋆鴻臚寺少卿曹毓瑛惠親王綿愉惇親王奕誼醇郡王奕譞鍾郡王奕詒孚郡王奕譔睿親王仁壽肅親王華豐御前大臣奕山貝勒載治奕劻貝子綿勳公載岱大學士賈禎周祖培尙書瑞常倭什琿布麟魁萬青黎僉稱應晉 徽稱媿隆 三后並申 配廟之儀用展承 先之志因思我 皇考大行皇帝仰承 康慈皇太后 撫育十有餘年備荷 恩勤固已疊晉 尊封闡揚 盛美今以沖人纘緒之初勉思繼述緬懷 聖孝之無窮宜極追崇之盛典今廷臣所擬詳慎公允不獨於 康慈皇太后懿德洵相符合實足以慰 皇考在天之志此天下萬世之公論非朕一人顯揚之私亦非臣下尊親之私情也謹據所奏恭上

尊諡曰 孝靜康慈端惠弼天撫聖成皇后 升祔 太廟永
極尊崇所有應行典禮該部敬稽成例以聞仍將 尊諡恭擬加
至十二字以符舊制而表 隆稱尋大學士桂良等奏恭擬加上
孝靜康慈皇太后尊諡曰 孝靜康慈懿昭端惠弼天撫聖成
皇后得旨是○諭前因 郊祀配位於道光三十年奉有 皇祖
宣宗成皇帝硃諭遺命二條又奉 皇考大行皇帝諭照禮親王
全齡等議仍行 郊配祔 廟並明降 諭旨嗣後 郊祀配位
以 三祖 五宗爲定仰見 皇考曲體 皇祖遺訓 聖謨洋
洋允宜遵守惟我 皇考功德昭著洽被寰區薄海臣民咸深欽
仰雖奉 聖訓升配典禮不復舉行朕實不敢遽從亦不敢遽定
當經降旨令王大臣會同大學士九卿翰詹科道敬謹詳議據禮
親王世鐸等睿親王仁壽等前任侍郎黃宗漢及載垣等各據所

見分別覆奏迨朕恭奉 梓宮回京後復據大理寺少卿潘祖蔭等奏以議禮大典請飭廷臣再議以昭詳慎並據恭引 大行皇帝聖製甲寅孟夏齋宮卽事成什詩句有以後無須再變更之

諭因降旨令諸臣敬謹再行妥議昨據禮親王世鐸等集議以聞仍以仁壽等原議本與諸臣歧異而此次集議亦復列銜恐有遷就之處飭令該親王等另行具奏茲復奏稱前次另銜會奏並非別有意見等語粵自成周郊祀后稷以來厯漢唐宋明或一帝或二帝至三帝升祔而止未有如我朝之 聖 聖相承勲德並茂郊壇配位永極尊崇足愜乎天下萬世之心而無異議者惟配位遞增無窮而 壇壝規制有定我 皇祖遺訓恐世世視爲成例率行無已不獨有背於古訓亦難示信於後人 聖訓精微度越往古所以爲萬世慮者義正辭嚴允無遺議我 皇考聖孝

仍欲紹修 配位用展顯揚敬繹 殊諭未敢遽行特 詔羣臣
集議始如禮親王全齡等所請舉行又恐後世子孫視 先帝訓
誠爲尋常謙德煌煌 聖諭等若具文用特 垂訓嗣後 郊壇
配位厯億萬年總以 三祖 五宗爲定並恭錄 皇祖殊諭首
條及此次 諭旨懸奉 南郊齋宮垂示久遠世世遵循罔敷不
准再議更張又於甲寅孟夏 郊祀齋宿形諸篇什 訓註周詳
至精至當顧我 皇考功德之崇若遽弗獲比隆 列祖朕心實
有難安而事闕明禋大典天下萬世觀瞻所繫兩朝 遺訓遠大
精深又何敢不懷思志事是用博採周諮特命廷臣再三集議今
據世鐸等所奏禮貴制宜孝當承 志等語朕奉 母后皇太后
聖母皇太后召見議政王奕訢軍機大臣大學士桂良尙書沈
兆霖侍郎文祥寶鋆鴻臚寺少卿曹毓瑛惠親王綿愉惇親王奕

詠醇郡王奕譞鍾郡王奕詒孚郡王奕譔禮親王世鐸睿親王仁壽肅親王華豐順承郡王慶恩御前大臣奕山貝勒載治奕劻貝子綿勳大學士賈禎周祖培尙書瑞常倭什琿麟魁萬青黎趙光詳加垂詢均稱 宣宗成皇帝遺訓 大行皇帝諭旨準古酌今洵足垂爲萬禩法守非徒用示謙沖若不敬謹遵循非惟無以彰美 至德於心更有難安亦恐無以垂法則於天下萬世不得已勉從諸臣所議謹遵 皇考諭旨 郊壇配位厯億萬年總以

三祖 五宗爲定世世子孫永爲法守凡此務求得乎天理人情之至以承 先志而慰 在天之靈天下後世必能共仰 先帝

之善繼善述及朕萬不得已之苦衷也仁壽等載垣等及黃宗漢前摺均毋庸議至 皇考功德超邁允宜稱 宗祔 廟百世不

祧自應恪遵 成憲恭候 山陵禮成祇奉 神主升祔以致孝

享而盡尊崇所有應行典禮著該衙門屆時敬謹詳察具奏將此
宣諭中外知之○諭 皇祖宣宗成皇帝嬪御前經加崇位號以
申敬禮因思 常嬪侍奉 皇祖最久謹尊封爲 常妃 祥嬪
誕育惇親王謹尊封爲 祥妃所有追封應行事宜著該衙門察
例具奏○諭予告大學士祁寓藻忠清亮直學問優長著卽來京
聽候簡用○諭予告大學士翁心存守正不阿學問淹博前任太
常寺少卿李棠階學養深邃方正老成朕當御極之初亟應延訪
耆儒以資輔翼翁心存尙未出京著卽銷假聽候簡用李棠階見
在河南辦理團練亦著卽行來京候旨以副朕側席興賢人惟求
舊至意○諭三品卿銜翰林院修撰劉繹學優品正告養回籍有
年見在養親事畢辦理本籍團練著俟服闋後卽行來京聽候簡
用○諭前因已革吏部尙書陳孚恩阿附載垣端華肅順業經明

降諭旨將陳孚恩革職永不敘用昨日因睿親王仁壽等前次遵

議 皇考大行皇帝 郊祀 配位與廷臣所議歧異而此次禮

親王世鐸等遵議典禮摺內又均列銜恐有遷就因命仁壽等另

行陳奏乃本日據仁壽等覆奏稱前在熱河會議時陳孚恩聲稱

道光三十年 大行皇帝以 三祖 五宗爲定之 旨係原任

協辦大學士工部尙書杜受田所擬又稱在京王大臣等會議摺

內籲懇恪遵 遺訓無庸舉行 郊配典禮係因 大行皇帝去

秋 巡幸熱河起見各等語 郊壇 配位大典攸關爲臣下者

宜如何援據禮經敬慎詳擬乃陳孚恩率以荒誕無據之詞冀聳

眾聽揣其意不過欲掇合仁壽等一同列銜以便其諂媚載垣等

之計謬妄卑污至於此極又查鈔肅順家產內多陳孚恩親筆書

函中有闇昧不明之語朕新政頒行務從寬大姑勿深究惟其與

肅順交往密切已屬確有證據若不從嚴懲辦何以示儆將來陳
孚恩僅予革職永不敘用不足蔽辜著派瑞常麟魁前往將陳孚
恩拏交刑部即將該革員寓所貲財嚴密查鈔並著派大學士周
祖培軍機大臣文祥會同刑部定擬罪名具奏○官文曾國藩奏
楚軍克復安慶等城後卽由廬江規取無爲州城因三河等處之
賊麇集泥汊口神藤河兩路以阻我師九月十五日臬司曾國荃
會同總兵王明山等督帶兵勇力攻泥汊口賊壘該逆驚退追斬
數百名十八日進攻神藤河賊壘四面圍攻該逆棄壘竄逃我軍
分路截殺斃匪甚多王明山等督率水陸各軍於二十日齊抵無
爲州城下該逆死拒不出王明山自率萬化林等分攻東北各門
城中賊匪紛紛由北門竄去我軍水陸圍剿拏斬悍賊二千餘名
投水溺死者無數立將無爲州城克復又搜殺悍賊五六百人其

運漕河踞賊經曾國荃等乘勝進剿焚燒賊船數十號擒斬賊匪千餘名遂於二十三日將運漕河賊壘克復此次尤爲出力之總兵王明山等應行開列仰懇 天恩俯准給予獎勵其餘出力及陣亡員弁勇丁容臣等查明分別辦理 上諭此次水陸各軍克復無爲州城並乘勝攻克運漕河賊壘剿辦甚屬出力布政使銜記名按察使曾國荃著賞給頭品頂戴總兵王明山著交軍機處遇有提督缺出提奏總兵萬化林等均著以總兵儘先提奏其餘出力及陣亡員弁兵勇著官文等查明奏請獎卹○官文李續宜奏隨州踞逆負隅堅守抗拒大軍臣等調都司劉維楨馳赴隨州隨同道員劉嶽昭設計誘賊出城馬步合力截剿擒斬賊匪多名餘逆由西河竄遁我軍齊隊環攻當於十月初一日將隨州城池克復所有尤爲出力之道員劉嶽昭等應行開列仰懇 天恩俯

准給予獎勵其餘出力員弁容臣等查明保奏 上諭此次官軍

克復隨州尤爲出力之道員劉嶽昭著以按察使記名請旨簡放
並賞加布政使銜都司劉維楨著免選本班以遊擊儘先補用其
餘出力員弁兵勇著官文等擇尤保奏○諭議政王軍機大臣等
有人奏山東巡撫譚廷襄本係棄瑕錄用之員並不愧勵圖報以
贖前愆藩司清盛性尤貪鄙各等語僧格林沁久駐東省自應確
有見聞著將所參各節逐一詳查據實具奏原摺著鈔給閱看將
此諭令知之○諭前因張亮基奏參徐之銘種種謬妄各情當將
節次寄信劉源灝並明發 諭旨及張亮基等摺片等件鈔給福
濟閱看諭令該督秉公查辦矣本日有人奏徐之銘聲名狼藉在
署時常演戲宴客等語封疆大吏有整躬率屬之責似此劣迹昭
著何以整飭官方著福濟遵照前奉寄諭一併確切查明據實具

奏母稍徇隱原摺節鈔閱看將此由五百里諭令知之○諭穆克德訥等奏英法兩國遵照前議於九月初一等日次第撤兵出城將省城各門交還十八日一同登舟由黃浦回香港而去均屬安靜等語該兩國兵丁撤退後善後事宜攸關緊要所有省城空曠地方防守更宜嚴密其新城老城所需礮位並派撥看守之旗營官兵以及城樓兵房應行修葺各工大黃濠礮臺應行安設礮位並城鄉內外清釐戶口編查保甲等各事宜均著照該將軍督撫所議迅速妥爲辦理以靖奸宄而備不虞耆齡身任巡撫不宜久住省外應卽回省會同穆克德訥勞崇光經理地方一切事務將此由五百里諭令知之○理藩院尙書慶福卒予祭葬○丁丑諭內閣我 皇考大行皇帝御極之初以臣工習問因循 御製詩篇垂戒嗣復 御製書事文 頒示廷臣勸以共濟時艱弗啟恬

嬉之漸當時在廷諸臣猶能仰體 聖訓慎勤共矢乃日久懈生
或遇事模稜不思振作任聽司員蒙混具稿年來經 皇考大行
皇帝降旨申飭嚴切批示者不可枚舉爾大小臣工受 皇考大
行皇帝簡用之恩朕側席求賢殷殷思治若復仍前玩泄固無以
上酬 知遇且清夜自思能無內愧嗣後爾諸臣務各振刷精神
勤求政事於興利除弊之事必須認真講求其有特旨交議會議
或令速議之件均宜妥速辦理其各衙門尋常事件屆期應行題
奏者亦須逐日清釐毋任積壓以期綱舉目張官無廢事經此次
明白曉示之後儻敢性耽安逸曠玩公事朕必立予嚴懲以爲遇
事因循者戒爾諸臣其敬懷之○諭已革吏部尚書陳孚恩前在
署理山東巡撫任內經 皇祖宣宗成皇帝賞給 御書清正良
臣扁額已革吏部右侍郎黃宗漢前在浙江巡撫任內經 皇考

大行皇帝賞給 御書忠勤正直扁額見在陳孚恩業經革職治罪黃宗漢已革職永不敘用所有前經 御賞扁額均著卽行恭繳○戊寅諭內閣勝保奏官軍進剿大股教會各匪獲勝一摺山東教會各匪屯踞冠縣負嵎抗拒經總兵成祿等分帶馬步各隊追剿二百餘里步賊萬餘殲斃殆盡曹州府屬捻逆分股擾及開州等處經副將黃得魁督帶馬步兵勇迎頭截剿該逆聞風震懾紛紛潰敗剿辦尙爲迅速仍著督飭各軍直搗賊巢務期埽蕩逆氛毋畱餘孽○諭直隸團練大臣桑春榮著卽回京供職該省團練事宜卽著責成文煜辦理江西團練大臣劉繹俟服闋後來京聽候簡用所有江西省團練事宜並卽責成毓科督同該省官紳妥爲辦理其該二省京員如有藉詞回籍復經本籍督撫保舉辦團之員卽著各部院衙門查取職名咨行文煜毓科撤去辦團名

目飭令來京供職○袁甲三奏懷遠練眾跋扈經李世忠暫將淮南練總直隸州知州金汝霖款畱營中責令調練隨剿十月初三日遊擊康錦文帶領練勇於老西門紮營袁保恆由東北李世忠由東南以次並進層層圍困城練驚恐初四日冒死衝出計奪我軍營盤副將王才秀等各帶隊要擊拏斬頗多初五六等日該練添調外援水陸兩路均被李世忠親督大隊擊退壞其礮船二十餘號殺斃悍賊三百餘人城內蒼黃屢次乞撫適接翁同書鈔來奏豪以壽城之事係朱景山等力阻撫局苗練挾忿報復專爲尋仇並非爲攻城起見苗沛霖並無二心已由翁同書具奏籲懇恩旨矜全臣宣示懷遠城內該練等以苗沛霖尙且如此乞撫愈爲懇切情願迎官入城臣與李世忠計議尙未遽允所請又據翁同書函稱苗沛霖深以懷遠爲慮並云壽州之案業已完竣臣如撤

兵苗沛霖亦卽撤隊薙髮等語查此次派撥隊伍水陸並進本爲解壽州之圍今翁同書屢次來面臣如一意主勦兵連禍結恐無已時已札飭懷遠縣知縣英俊於十二日進至小街練圩該練總等迎請入城百姓歡呼大局纔定適定遠捻匪傾巢北竄已至淮河南岸攻撲民圩臣卽飭調袁保恆馳回長淮衛駐紮防勦仍咨會李世忠力守懷遠附近要隘以疏河道而觀動靜該練如真心悔悟從此永息爭端卽當奏懇天恩寬其既往責令勦捻立功儆或另生枝節則我之恩威俱至斷不能再事姑容臣惟隨時體察情形與李世忠會商妥辦又奏查勝保李續宜各有重兵且爲苗沛霖所畏服臣見接李續宜來函據稱欽奉諭旨暫署鄂撫擬卽進省並云見在皖事較難必薦人自代親自督師入皖於心乃安苗練如能就撫固佳否亦無足爲慮等語是該撫無日不以皖

爲念並不以苗事爲棘手楚師埽除皖寇勢成破竹辦理必有把握至勝保係因苗練之事於六月間奉命來皖早經出示曉諭派員來皖查看苗練亦望其速來臣智力俱竭應請 皇上於該二員中特派一員飭令星速來皖督辦力圖補救實於剿撫兩有裨益又奏苗沛霖闖入壽州後雖未殺害官長而城內已設公局城門派人看守假官勢以號召陽爲乞撫轉圜陰實希圖占踞臣非不知其詐特以餉絀兵單未能制其死命翁同書身在壽城業已代爲具奏臣不得不暫事牢籠姑無論就撫後未必不生枝節也即使助官剿賊彼仍藉團練爲名處處設立公局使民練悉歸所部其勢愈張其地愈廣是官軍轉爲彼用矣值此剿撫兩難而欲以飢軍剪除亂萌其勢萬萬不能臣營餉項皖省旣無從籌畫各處協撥之餉本年已及十月僅解到七萬兩雖屢奉諭旨嚴催而

各省均置若罔聞如 皇上鑒臣之愚不以臣爲不肖仍責令勦賊務懇飭撥三東省馬隊二千名並月撥實餉十萬兩俾臣得藉以展布儻一年之內不能埽除苗逆廓清淮甸臣願從重治罪

上諭議政王軍機大臣等袁甲三奏懷遠獲勝苗練求撫將翁同書信函鈔錄呈覽並懇請添調馬隊撥給軍餉即可埽除苗逆等語苗沛霖攻破壽州翁同書爲所挾制所稱該練應撫情形未必翁同書本意第因皖境多事諭令袁甲三籌辦茲閱所呈翁同書信函有苗沛霖以懷遠爲慮之語是其以求撫爲緩兵之計固已顯而易見袁甲三已令李世忠等暫行撤兵乃另摺復稱如能兵餉俱足即可蕩平苗逆是該大臣深知苗沛霖之終難就撫而仍不敢言應勦且以調兵撥餉爲詞迹涉要挾尤屬非是袁甲三於皖省軍務責無旁貸卽著察度情形如苗練果屬可撫卽將前次

發去諭旨宣示責令該練等退出壽州懷遠隨營自效儻必應勦辦卽著一面奏聞一面督飭李世忠等迅速進兵並將從逆各練設法解散以期早就蕩平朕亦斷不責其有礙撫局該大臣於苗沛霖一事業已貽誤於前若再依違兩可議撫則諉之翁同書議勦則以爲兵單餉絀難於措手游移無定害且日深其何以仰副皇考倚任之重耶該大臣身膺重寄所有應撫應勦事宜自必確有定見其卽迅速奏聞不得以勦撫兩難推諉了事至軍營餉項支絀亦屬實情本日已諭知山東河南山西陝西江蘇將應解協餉速行撥解至東三省馬隊實已無可調撥如苗黨必須勦辦該大臣惟當就見有兵力會合楚師妥籌防勦毋得再以調兵瀆請將此由六百里諭令知之○諭寄諭湖廣總督官文兩江總督曾國藩安徽巡撫彭玉麟浙江巡撫李續宜袁甲三於苗沛霖一

事或勦或撫尙無把握官文等惟當飭令帶兵各員與袁甲三商定辦理庶不至勦撫兩歧彭玉麟身任皖撫應將此事悉心籌畫見在隨州及無爲州俱已據官文等奏報克復曾國荃一軍如能繞越和含取道滁全與袁甲三會合即可壯皖軍聲勢無論苗練應勦應撫均有裨益儻曾國荃不能分身應如何派撥一軍間道馳赴潁壽抑或彭玉麟親赴潁壽相機辦理均著官文曾國藩李續宜妥爲商辦以顧長淮大局毋稍遲誤將此由六百里各諭令知之○諭勝保奏安撫苗練非親往不能就緒惟須河北肅清方可振旅而行請再行明降諭旨令該大臣節制皖豫官兵並將潁州歸德紳民稟函呈覽潁州歸德士民均盼勝保移師前往惟濮范之匪悉由河南回竄勝保所稱亟應擣其老巢將該匪悉數殲除嚴固北路仍須譚廷襄駐紮東昌大名道王榕吉駐紮大廣一

帶聯絡聲勢該大臣方能赴潁辦撫自屬實在情形著勝保遵照前旨悉心酌度如大名卽就肅清東匪不至再有蔓延離營以後有得力大員可以暫統諸軍卽著馳赴潁壽將苗沛霖事宜妥爲籌辦至苗練因懷遠被攻求撫難保非緩兵之計袁甲三於勦撫機宜仍屬游移兩可本日已諭知袁甲三再行妥籌如該練實應勦辦卽督飭李世忠等會合楚師速行進兵毋稍瞻顧勝保並可確加偵探以定行止前發去諭旨一道切勿先行宣露該大臣旣未能卽赴皖省則河南軍務係嚴樹森專責已諭令該撫無許推諉該大臣所請節制皖豫官兵自毋庸再降諭旨已革貝子德勒克色楞兒在尙未省釋所請飭令帶兵赴營效力之處著毋庸議將此由六百里諭令知之○諭薛煥奏浙省軍情緊急籌濟軍火米糧一摺僞忠逆賊黨由江西竄入金衢嚴三府屬僞侍逆又率

賊十餘萬分道直徧杭州省中見無十日之糧蕭山紹興兩城復陸續失守甯紹餉道已斷宜興廣德等處賊匪復陷長興杭州並警軍火米糧匱乏難支該撫見由蘇省籌解米三千石火藥二千斤洋礮洋槍各一百件分解杭湖接濟著迅速雇覓海船由鼇子壩運入江口毋稍遲誤見在浙省逆氛徧地處處告警蕭山紹興一經失守則甯波道途梗阻省城接濟無路可通此時各省協浙餉銀勢難遽到蘇省與浙江壤地毘連且江海關稅入較多籌措尙易著薛煥迅速分撥稅銀就近解往杭州以濟急需並著隨時探明情形源源接濟毋稍推諉江浙唇齒相依固浙省之藩籬卽以保滬城之門戶該撫務宜不分畛域竭力圖維以顧東南大局紹興府城是否克復並杭州近日戰守情形仍著該撫確實探明隨時具奏將此由六百里諭令知之○諭前因浙江軍情喫緊諭

令曾國藩卽飭左宗棠帶領所部兼程赴浙督辦軍務茲據慶端奏浦江等城失陷浙省危急等語逆首李秀城一股由玉山竄陷常山一由廣豐闖入江山境內衢防喫緊其李侍賢一股自連陷浦江嚴州等郡縣後據薛煥奏報賊蹤已偪省城蕭山紹興郡縣先後失守雖據探有收復紹興之信尙恐未能的確是浙省軍情萬分危急慶端擬親統官軍赴浙督勦惟尙須選軍籌餉方能前進且廣豐之賊窺伺閩疆光澤崇安等防務處處喫緊本日業經寄諭該督令其督兵暫駐閩浙交界相機進勦至浙省待援孔亟急盼左宗棠一軍迅速趕到方能挽救大局著曾國藩仍遵前旨迅飭左宗棠帶領所部星馳赴浙督辦軍務慶端所派總兵林文察一軍已赴浦城由江山直擣金蘭已革道員馮席珍兵勇業已馳抵嚴州卽可會合夾擊力掃賊氛所撥江西軍餉十萬兩卽由

左宗棠催提應用以利師行鮑超赴援廣信力解城圍江西漸次肅清能否就近馳往援應並著曾國藩妥速籌辦將此由六百里各諭令知之○諭慶端奏道員張啟煊進援浦江潰退常山江山等縣失守衢州被圍擬卽整軍入浙等語賊匪攻陷嚴州等城直逼杭州僞忠逆等復竄陷常山江山進圍衢州浙江情形業已全體糜爛亟應保全省城尙可將各郡徐圖恢復慶端已派總兵林文察統帶臺勇赴援著卽飭該總兵星馳前進與道員馮席珍等軍聯絡聲勢分投攻剿尤宜閒道馳抵杭州先顧根本其左宗棠一軍本日亦催令趕緊赴浙矣慶端兼轄浙省責無旁貸惟江西賊匪意圖紛竄閩省亦應嚴防著該督斟酌情形如左宗棠果能赴浙卽著將續調之臺灣漳州等兵勇六千名交總兵曾玉明等統帶前進會合林文察等軍悉歸左宗棠節制實力攻剿該督卽

可暫緩入浙駐紮閩浙交界籌辦防務相機進剿至杭州已無十日之糧危急萬狀前諭將閩海關應解餉銀解往接濟並著慶端瑞璜將此項餉銀速行催提派委委員由海道迅速解赴杭州毋許遲誤應解左宗棠月餉並著該督等按月如數籌解將此由六百里諭令知之○左副都御史潘祖蔭奏去年各省設立團練大臣辦理年餘曾無一效請獎請敘紛紛效尤並未克復一城其爲無益已可概見應請旨將團練大臣卽分別裁撤以一事機而節糜費翰林院侍講學士顏宗儀奏團練一法原以百姓之財力衛百姓之身家果能眾志成城同仇敵愾卽一舉貢生監足以統領之無俟大員爲之督率也若必揀派大僚以總任之幫辦司員以分理之是督撫之外又設督撫僚屬之外又添僚屬而騷擾不可勝言矣卽如上年豫省辦團各省團練大臣亦紛紛四出繼因浙

江四川陝甘等省情形不同旋請裁撤而直隸山東江南江北等處則仍歸團練大臣辦理於是幫辦人員假公濟私百端紛擾或信勒州縣供應或苛派民間銀錢或於官設捐局之外團練再設捐局或於官抽釐金之外團練再抽釐金或查閱各處團練支應紛繁地方告乏或任令家人僕隸勒索規禮約束不嚴彼所保幫辦人員或十餘人或數十人此輩薪水出於何處要皆剝民膏搜羅商販刁生劣監因以把持地方狡吏貪夫藉以希圖名利種種弊竇爲害實甚臣風聞各省團練大臣直隸桑春榮操守尙好山東杜翻已嘖有煩言至於江北江南自上年至今未聞有團練大臣收復一州一縣者徒以騷動天下無益有損亦何取於此耶除山東杜翻業經裁撤河南毛昶熙較有成效仍行畱辦外可否請旨將直隸江南江北等處團練大臣一併撤銷令其回京當差

至各省州縣離賊較遠者應令停止辦團以安民業其離賊較近地方仍責地方官認真團練而以督撫總其成庶事權不至歧出各省紛擾可免 上諭江北團練大臣晏端書江南團練大臣龐鍾璐其辦理團練是否仍須該員等經理抑或即可裁撤著曾國藩薛煥體察情形迅速具奏王履謙幫辦浙省團練兼辦浙東捐務見在浙省情形喫重一時自難遽撤著王有齡會同該員認真經理務須和衷籌辦以固疆圉至毛昶熙在河南歸德尙屬著有成效見已補放順天府府尹應否仍令該員督辦團練及辦理有無把握之處著嚴樹森妥籌速奏○袁甲三奏捻逆張落刑因踞定城本年四月閒旬結西捻竄至長淮衛一帶經臣與李世忠督率兵勇鏖戰旬餘累獲大捷該逆敗竄回巢十月十二日該逆乘閒由鳳陽府西南繞赴長淮衛搶占柳姓民圩臣派知府李元忠

紮營沫河口及長淮衛北岸復調袁保恆一軍馳回會剿十四五等日該逆屢次撲營均經官兵擊敗悉向西南山路奔逃臣見飭各軍探蹤追剿報聞○己卯出貝子德勒克色楞於獄○賞護送

梓宮京旗各營兵半月錢糧○庚辰 上詣觀德殿 大行皇

帝几筵前行百日大祭禮釋縞素○僧格林沁國瑞奏捻匪劉添詳等率黨萬餘自高密壽光章邱等處南竄已至鄒滕境內臣僧格林沁當將馬步各隊調回嶧縣截剿該逆知我軍駐紮蘭嶧遂由西路回竄濟甯巡橋地方經西凌阿等帶隊迎剿該逆見我軍均在西路遂於十月十一日竄至滕縣東南之楊莊盤踞臣國瑞督隊分剿賊匪向西北竄逸十二日我軍追至滕縣之罔山地方該逆拌死拒守我軍施放槍礮斃賊無算復經舒通額分隊鈔襲逆勢不支向西奔竄我軍奮勇追殺二十餘里斃賊二千餘名救

出難民數千名該逆於是夜由濟甯東南石佛趙村一帶躡渡運河因我軍追殺旋即向南回竄西凌阿督帶舒通額等各起馬隊由濟甯金鄉一路跟追行至魚臺見該逆拋棄輜重甚多連夜遁回已於十六日竄過大隄臣僧格林沁畱德楞額駐紮嶧縣遂與臣國瑞帶隊由嶧縣起程自滕鄒兗州汶上一路西行十九日馳抵東平迤西安山駐紮俟探明黃河南北匪蹤相機追剿諸城另股捻匪分爲兩股一向壽光等處西竄已於罔村痛加剿洗一由膠州沿海回竄尙無著落接據邳州知州馬步瀛報稱十月十四日突有花旗捻匪自東而來竄至窯灣紮筏渡河經馬步瀛率領團勇擊其半渡斃賊數十名淹斃無數餘匪潰逃查此股即係由膠州沿海分竄之賊亦經略受懲創所有前後各股捻匪除殺斃外其餘敗殘之匪業已悉數出境再臣僧格林沁疊奉諭旨令臣

酌度情形或全軍南下或分撥馬隊赴田在田軍營助剿臣等查曹屬東昌均有匪徒滋擾見在范縣失守亦應及早收復必須東境肅清方可南下至於分兵助剿一節臣等軍營馬隊僅三千餘名一經分撥則腹地烽煙難以迅掃自應暫緩抽撥頃接探報曹屬匪首劉前等股已由羅家河口渡河西竄分股擾至范縣荷澤見在賊情自應先由河北進剿當經臣僧格林沁飭西凌阿帶領馬隊馳赴安山一俟到齊卽由臣國瑞統帶馳赴東昌相機進剿臣僧格林沁由河南帶兵遙爲聲勢使匪眾不敢分竄以期剿辦得宜上諭內閣此次官軍擊剿高密壽光等處西竄捻匪連獲大勝餘賊悉數出境剿辦甚屬得力著僧格林沁乘此聲勢督飭各路兵勇將山東分竄各路股匪迅速殲除毋畱餘孽諭前江西吉南贛甯道沈葆楨經 皇考大行皇帝特旨簡用續因籲懇

終養回籍茲當需才孔亟該員亦當移孝作忠艱難共濟著慶端瑞璜傳諭沈葆楨迅赴曾國藩軍營聽候該大臣酌量奏請簡用○署安徽巡撫賈臻奏近有壽營委員來潁據稱城內乏食已久至九月中旬勢已不支又聞臨淮援軍水陸並進六安練勇亦至人心爲之再振不料二十六日夜忽有內變開門納賊苗沛霖尙在遲疑博崇武率苗黨之紅旗隊先驅直入尹善廷慶瑞督隊繼之逐戶搜搶擾攘既定苗沛霖始從容入城大戶與有嫌怨者殺害仍屬不少地方文武各官均未戕害翁同書所奏苗練求撫情形乃係博崇武授意把持不惟非翁同書之所欲亦並非苗沛霖之所求未可據爲定論也該逆於十月初七日已回下蔡畱眾二千餘人占踞壽城探聞傳集逆黨先攻臨淮次攻潁郡又有分撲蒙城占取潁上之信見又令阜東各圩眾東下雖偵探之詞未必

皆確而其竄擾之心固未嘗一日稍息也潁郡爲豫省門戶儻有
疏虞北路大局亦岌岌可危臣接官文等咨已撥隊進駐六霍惟
長淮所限恐未能繞越而前該逆黨與繁多雖有楚師亦必分眾
抗拒仍難制其乘虛北來惟望勝保一軍自北而南可以夾攻兜
剿且該逆悍黨日盼勝保早來是勝保一到不必專用兵力即可
收我之團孤逆之黨不過數旬苗逆之事可了彼時再令折回河
朔保障畿疆似亦不至有誤又奏本年正月閒苗逆糾眾渡淮徧
脅各圩歸附其時壽南練總守備王舟卽倡率鄉團齊心堵禦逆
練始行退回至六月後該逆圍壽之眾愈集愈多王舟挑選得力
練丁與其堂弟都司王雲芳扼紮堰口集老廟集逐日裹糧出隊
踏毀尹家岡青蓮寺康家店賊營三十餘處七月閒進紮城南十
三里谷堆地方該逆挖掘長濠力阻城中進糧之路王舟復誓師

死戰於八月初四日攻破濠外賊營三座搶險運糧入城旋即築
壘濠邊冀保糧道逆練四面攻撲獨力難支因突圍而出回至谷
堆原營詎原紮周圩之守備趙森保已率眾投苗情形萬緊適臣
檄調之參將韓殿甲督同守備劉銘傳等管帶舒合六等處團練
六千餘人陸續抵壽連營十餘里踏毀賊壘多處我軍聲勢復振
兼以臨淮大隊已抵懷遠兩面夾攻重圍可期立解乃於九月二
十七日有城內難民紛紛逃至王舟營中僉稱守城之遊擊朱佩
芬都司柏雲錦千總吉玉成外委朱淮潮等作爲內應苗逆業經
入城王舟旋見城頭火起一時憤激嘔血殞命所部練勇與韓殿
甲之眾止得暫時撤退查壽州被困八月有餘多賴黃鳴鐸王舟
二員內守外攻力持危局茲王舟以城垣失陷發憤捐軀深堪痛
惜相應仰懇恩施飭部將都司銜守備王舟從優照遊擊陣亡例

議卹其首先投苗之守備趙森保與爲賊內應之遊擊朱佩芬都司柏雲錦千總吉玉成外委朱淮潮等身係職官甘心從逆應請旨一併革職交新任撫臣彭玉麟就近從嚴查辦至前署壽春鎮總兵陝西潼關協副將黃鳴鐸城陷被執罵賊不屈苗逆乃不欲其速死焚鬚割耳吊打數日徧體鱗傷該署鎮雖身無完膚冒聲益烈要其成仁授命亦不過在旦夕之間又奏探報十月十五日粵逆自湖北隨州竄至固始之丁家埠周家店一帶聲稱由阜境之小曹家集渡河東至正陽與苗營會話等語查潁郡防剿正當應接不暇之時突來此股粵逆人心已不免驚慌若任其與苗沛霖勾結爲患更不可言臣營兵力僅敷守城若非勝保速帶大兵及早來皖賊勢必致蔓延上諭議政王軍機大臣等前因苗沛霖攻破壽州剿撫情形疊經諭令官文等妥爲商酌辦理茲據賈

臻奏稱苗沛霖自入壽城後殺害大戶不少翁同書所奏苗沛霖求撫各情乃係博崇武等授意把持非翁同書之所欲苗練見回下蔡畱眾二千餘人占踞壽城等語苗沛霖就撫情形本因皖省兵力不敷暫爲一時權宜之計見在賈臻所奏該練有先攻臨淮次攻潁郡分撲蒙城占取潁上之信是該練鴟張情形以乞撫爲緩兵之計已可概見前經疊諭官文等籌商令彭玉麟或帶隨州黃郡之兵由三河尖馳援潁郡見在彭玉麟能否前往未據覆奏該撫有地方之責設任苗練占踞臨淮潁上則將來辦理愈形棘手自應酌度情形儻苗練尙可就撫卽當遙爲聲援俾知畏懾兵威如情形反側亦宜迅速進兵與袁甲三會合攻剿其駐紮霍六之提督成大吉等旣與壽城相去甚近能否卽移師前往並著官文曾國藩彭玉麟李續宜妥爲籌商相機辦理或

蔡卽將壽城攻克奪其所恃並解散其黨與勦撫均易得手於皖省必有裨益袁甲三專辦皖省軍務豈容稍有推諉一誤再誤毫無定見著與翁同書密籌如果苗沛霖真心歸順卽遵前旨辦理儻萬不能撫翁同書卽設法赴霍六約會楚軍克復壽州朕尙可寬其既往不予懲處不得再受人意指代爲具奏賈臻見署皖撫駐紮潁郡苗練既有攻取潁郡之信自當激勵兵團盡力防勦豈可一無展布專待勝保南下爲克盡厥職耶另片奏壽州被圍多賴黃鳴鐸王舟二員力持危局王舟以城陷捐軀黃鳴鐸被執不屈身受重傷死在旦夕已明降諭旨將王舟飭部優卹矣首先投苗之守備趙森保等請飭查辦等語守備趙森保等身係武弁甘心從逆不可不嚴加懲治所有守備趙森保遊擊朱佩芬都司柏雲錦千總吉玉成外委朱淮潮均著卽行革職交彭玉麟查辦以

昭法紀黃鳴鐸是否被苗練戕害並著彭玉麟查明具奏至長髮逆賊有東至正陽與苗練會話之信已諭知嚴樹森派兵防剿仍著賈臻固守潁郡毋得諉爲兵單專待他人援救儻潁城稍有疏失朕斷不能寬貸也將此由六百里各諭令知之○諭據賈臻奏苗沛霖見回下蔡畱眾二千餘人占踞壽城又令阜東各圩悉聚東下勝保能抽身一到不過數旬可了等語勝保見在攻剿濮范之匪急應擣其老巢自未能移師南下惟苗沛霖鴟張愈甚其情形決難就撫該大臣前奏苗沛霖應撫各節尙未具悉皖省見在情形仍著該大臣悉心籌酌此事關係皖北大局不得因前奏議撫稍涉迴護亦不得因朕有此旨遽行遷就總當從長計議或撫或剿確有把握方不負朕諄諄詢問之意至勝保能否抽身南下之處並著迅籌具奏原摺片均著鈔給閱看將此由六百里諭令

知之○諭賈臻奏探聞長髮粵逆由湖北隨州竄至固始之丁家埠周家店一帶聲稱由阜境之小曹家集渡河與苗營會話等語苗沛霖反覆無常本日據賈臻馳奏情形能否就撫尙未可必見令官文曾國藩等妥爲籌商如有可乘之機即將壽城攻克奪其所恃皖省官兵攻剿如果得手該逆等勢必西竄豫境光固等處情形較爲喫重前經寄諭嚴樹森飭令候補道張曜督帶兵勇馳往剿洗見在粵匪捻匪勾結圖竄仍恐兵力不敷著該撫添派藩司鄭元善迅卽統兵馳赴光固一帶會同張曜協力兜剿如逆練會合粵匪西趨卽須以全力遏截毋令闖入豫疆將此由六百里諭令知之○諭前因有人奏江浙撫臣不洽輿情玩視軍務各節業經諭令曾國藩秉公查奏茲有人奏江蘇巡撫薛煥自到任後株守上海莫展一籌且收買寶玩性耽翹槩並將丁憂候補鹽運

使金安清違制保奏派伊勸捐金安清於通泰設局烜赫奢侈逐戶搜括怨聲鼎沸又有人奏薛煥自辦理通商以來廣通賄賂時輦金銀贈遺權貴浙江撫臣王有齡不以克復爲事惟以暴斂爲能各等語江浙軍務孔亟全賴封疆大吏實力整頓方能維持危局保衛地方如所奏情形營私納賄惟顧身家又安望其奠民生而掃賊氛耶著曾國藩將所參薛煥王有齡金安清各款彙入前參各款內一併秉公嚴密詳查據實覆奏毋稍徇隱原摺片著鈔給閱看曾國藩如果察看薛煥不能勝任卽遵奉前旨迅速保奏數員候旨簡放江蘇巡撫見駐上海所保之員必得於軍務地方及外國事務均屬相宜方爲妥協又前任吉南贛甯道沈葆楨上年該大臣曾經保奏本日已降旨令該員前赴該大臣軍營見在地方軍務在在需人該員到營後卽由曾國藩查看才具如果能

勝重任不必拘守常格迅速保奏聽候簡用將此諭令知之○諭
有人奏撫藩大員聲名平常恐誤大局一摺據稱江西省自上年
冬閒被賊竄陷數十州縣撫臣毓科一籌莫展平時性耽翹慕遇
事頗預信任門丁營私舞弊新任藩司慶廉前在浙江運司任內
於鹽課正額外每引加銀四錢藉肥私橐在浙藩任內納賄賣缺
聲名狼藉任河南巡撫時一味糊塗聽從伊子恩麟遇事把持各
等語江西省屢被竄擾撫藩大吏宜如何振刷精神維持危局若
如所奏巡撫則庸懦無能藩司則貪污不職必致貽誤地方於大
局殊有關繫單懋謙身任該省學政見聞較確著卽破除情面將
所參各情詳查具奏毋得稍有徇隱單懋謙如已交卸起程卽著
折回江西省城按照原參該撫藩各節逐一查明具奏原摺著鈔
給閱看將此由四百里諭令知之○諭有人奏參監司大員品行

卑污聲名狼藉一摺據稱福建藩司裕鐸前在臺灣道府任內本有貪濁之名自內調以來日事荒謔無所不爲撫臣瑞璣老病聾瞶不能治事屬員視同木偶無所畏憚督臣慶端遣人詢問意存遷就各等語撫藩大吏責任綦重似此劣迹昭著既不足資表率且無以厭民望而做官邪著慶端將所參各節嚴密查明據實具奏慶端前已遣鹽法道崇福向瑞璣詢問何以意存消弭竟不據實參劾此次若再徇隱姑容稍有不實不盡經朕查出定將該督一併嚴懲不貸原摺著鈔給閱看將此諭令知之○辛巳諭內閣前因賈臻周祖培沈兆霖趙光奏請操政權以振綱紀並皇太后召見臣工禮節及一切辦事章程應飭廷臣會議又據勝保奏請皇太后親理大政並另簡近支親王輔政各摺及御史董元醇前奏一摺當交王大臣大學士六部九卿翰詹科道應如何酌

古準今折衷定議之處妥議具奏本日據王大臣等遵將交議各件集議以聞並單開各事宜恭呈 慈覽欽奉兩宮 皇太后懿旨據王大臣等所議詳加披閱援據典章斟酌妥善著卽依議行垂簾之舉本非意所樂爲惟以時事多艱該王大臣等不能無所稟承是以姑允所請以期措施克當共濟艱難一俟皇帝典學有成卽行歸政王大臣仍當屆時具奏悉歸舊制欽此朕祇承 訓 謙抑慈愛之懷實深寅感敬思朕以沖人誕膺 景命痛惟

皇考大行皇帝遺大投艱煢煢在疚幸賴兩宮 皇太后保護

朕躬親裁大政王大臣等黽勉翼爲藉資宏濟惟是徒善不足爲政而制法尤貴從宜使非政令統一綱紀修明何以達羣情而正魁柄兩宮 皇太后不得已之苦衷實可昭揭日月垂示臣民粵稽往制漢晉以來至於有宋章獻宣仁史冊頌美欽惟 母后皇

太后 聖母皇太后盛德徽稱迥超前古肆予冲人幸荷 仁慈
參酌成規折衷時勢暫理庶政以待朕之躬親爾中外文武臣工
作朕股肱同茲心膂務各忠赤爲懷勤思輔翼百爾庶司恪共乃
職以襄邦治俾予典學日就月將迨朕親政之年孝養兩宮 皇
太后問膳 寢門承 歡璇室與天下臣民共觀厥成於以上答
兩宮 皇太后慈愛之懷下慰薄海臣民之望我 皇考在天之
靈實式憑焉將此宣諭中外知之○諭爲政以得人爲首務我朝
列聖御極建元均於三年大比之外特開鄉會恩科廣羅俊彥
今朕繼承大統宜遵成式嘉惠士林著於同治元年舉行鄉試恩
科二年舉行會試恩科用副朕作育賢才至意○諭戶部奏辦理
官號票存的擬章程開單呈覽並遵議御史許其光條陳官號私
虧各摺片官號官款票存見將收清所有四乾官號字樣著卽行

撤換仍勒限三箇月責令該商人將私開票存趕緊清釐不得稍有延宕貽累兵民儻不能依限收清卽遵前旨送交刑部治罪仍責令保商代爲清理如該保商不能清理卽一併治罪其五天官號並著內務府會同辦理○頒 闕里文廟暨太學各府州縣學扁額○命恭纂 大行皇帝實錄○禮親王世鐸等奏遵旨會議垂簾章程一 郊 壇大祀擬請遣王恭代 皇上於宮內齋戒俟數年後奏請親詣行禮一 太廟祭享擬請遣王恭代 皇上於宮內齋戒祭期前一日親詣行禮俟數年後奏請於祭日親詣行禮一 謁 陵御門經筵耕藉均擬請暫緩舉行一 遇元日 萬壽傳臚等大典禮 皇上升殿均擬請照常舉行一 召見內外臣工擬請兩宮 皇太后 皇上同御養心殿 皇太后前垂簾於議政王御前大臣內輪派一人將召見人員帶領進見一 京外官

員引見擬請兩宮 皇太后 皇上同御養心殿明殿議政王御
前大臣帶領御前乾清門侍衛等照例排班站立 皇太后前垂
簾設案進各員名單一分並將應擬諭旨分別註明 皇上前設
案帶領之堂官照例進綠頭籤議政王御前大臣捧進案上引見
如常儀其如何簡用 皇太后於名單內 欽定鈐用 御印交
議政王軍機大臣傳旨發下該堂官照例述旨一除授大員簡放
各項差使擬請將應補應升應放各員開單由議政王軍機大臣
於召見時呈遞恭候 欽定將除授簡放之員鈐印發下繕旨一
順天鄉試會試以及凡在貢院考試向係 欽命詩文各題均擬
援照外省鄉試之例請由考官出題其朝考以及各項殿廷考試
題目均擬令各衙門科甲出身大臣居日聽宣恭候 欽派擬題
進呈封交派出監試王大臣齎至考試處所宣示一殿試策題擬

照舊章讀卷大臣恭擬殿試武舉擬請 欽派王大臣閱視照文
貢士殿試例擬定名次帶領引見一慶賀表章均照定例辦理其
請安摺擬請令內外臣工謹繕三分敬於 母后皇太后 聖母
皇太后 皇上前恭進一 皇上入學讀書未便令師傅跪授亦
未便久令侍立擬請援漢桓榮授業之儀於 御座書案之右爲
師傅旁設一坐以便授讀欽奉 懿旨依議行○壬午諭內閣前
因已革吏部尙書陳孚恩迎合載垣端華肅順於遵議 皇考大
行皇帝 郊祀配位有荒誕無據之詞並與肅順書函往還語多
闇昧當派瑞常麟魁將該革員拏問查鈔家產並派周祖培文祥
沈兆霖萬青藜會同刑部定擬罪名具奏茲據周祖培等會同刑
部定擬罪名覆奏陳孚恩以一品大員惟以迎合載垣等爲心率
敢於會議 郊配大典時措詞謬妄且與肅順交往密切確有證

據情節尤重僅照奏事詐妄不實擬徒猶覺輕縱陳孚恩著照周祖培等所擬從重發往新疆效力贖罪○癸未遣官祭長白山

松花江 五嶽 五鎮 四海 四瀆之神 歷代帝王陵

孔子闕里○命戶部右侍郎寶鋆董恂在總理各國事務衙門辦事○甲申諭內閣前因許彭壽奏請嚴密查辦載垣端華肅順三人黨與當將指出形迹尤著之尙書陳孚恩等分別革職永不敘用以示懲儆嗣因諸王大臣遵議郊祀大典具摺兩歧經仁壽等覆奏陳孚恩種種措詞荒誕並查鈔肅順家產陳孚恩親筆閤味書兩尤多兩事併發是以復經降旨將陳孚恩家產查鈔並照周祖培等所擬罪名將其發往新疆效力贖罪實因其聲名狼藉依附迎合爲中外所共知情法所難宥也因思載垣端華肅順權勢薰灼肅順管理處所尤多凡內外大小臣工贈答書函均恐難

與拒絕當茲政令維新務從寬大自今以後諸臣其各滌慮洗心
爲國宣力朕自當開誠相待一秉大公斷不咎其既往稍有猜疑
所有此次查鈔肅順家產內帳目書信各件著議政王軍機大臣
卽在軍機處公所公同監視焚毀毋庸呈覽以示寬厚和平禮待
臣工至意○諭議政王軍機大臣等總理各國事務衙門奏據庫
倫辦事大臣咨稱俄國呈送槍礮已到恰克圖等語此項俄國送
到槍二千桿礮六尊除擇畱鳥槍數十桿礮一尊外其餘槍礮著
色克通額選派妥員悉行趕緊運至京城交外火器營查收此外
續到槍礮並著該大臣隨時派員分起運送至京其酌畱恰克圖
試演之槍礮並著督飭派往官兵等認真操演毋許虛應故事將
此由五百里諭令知之○命陝甘撥銀一萬兩濟巴里坤軍需○
是月緩徵山西薩拉齊廳水災米石蠲緩山東莒州等四十州縣

德州等五衛被災被擾新舊額賦租課廣西永安等四十二州縣暨歸德等七土州被擾上年錢糧兵米